


特 別
A18
4892
27





八18
4892
27

明詩綜卷八十下

小長蘆

朱彝尊

錄

于越

傅景俞

緝評

許

友四首

友字有介候官人有米友堂集

靜志居詩話先生才兼三絕名盛一時虞山蒙叟最愛其詩錄之入吾
彙集要其篇章字句不屑蹈襲前人正如俊鶻生駒未可施以韉勒

放鶴篇

予與鶴一隻親厚無間然近日恒苦饑人鶴兩可憐老
僧意惘惘投我詩一篇勸我縱遣之俾其返瀛壖予聞
情憫默招鶴立于前拱手與之別君今得遠遷煩以許
生貧試往海外傳長路多贈弋君當慎弓弦鶴亦白主



人世無如君賢予久服馴養多年伴林泉聞雞君嬾舞
著鞭讓人先獨我霜夜鳴君起聳寒肩長吟與子和月
落猶未眠前歲有估客自矜多腰纏購予以重價不惜
費十千意欲媚權貴籠致東廂偏主人拒之去義不受
一錢齋廚近蕭索休糧信所便不願入華亭不樂還青
田長依小池曲飲啄終殘年

龍洞

怪巖幾千古藤蘿挂其膝有洞可行人僅容六與七謾
謾聆秋風炎炎銷夏日雲從洞口歸

吾炙集
作入

水從洞口出

題淵明獨酌圖

黃花初放酒新香門巷蕭然意味長不管人間有風雨

先生高卧過重陽

作画

靈谷官梅放未曾石頭懷古不堪登無端縛就松鍼筆
画出青山是孝陵

孫爽 三首

爽字子度崇德人有甲申以前詩容菴集

竹枝鹽

吳娃蜀女貫如魚官家行樂信有餘合歡只合青羊車
青羊車捷於馬彼美人竹枝下

太湖戈船

嘗讀眉山詩雅羨魚蠻子誰知五湖中漁樂乃過此寬

如數畝宮曲房不見水雙舫截湖來橫網亘數里高眠
狎波濤天風聽所止長魚幾人搏尺許無足齒鬻賣逐
自然通侯富可擬亦有童子師書聲到水市衣食既鮮
華絃誦恒清美雖有桑大夫差科未擾是人生老戈船
頭白何須恥

詩話子度戈船之作係太湖雜詠六首之一戈或作畧大編魏我占湖
西石磯自非風動天不開也峭帆六七道破浪而行曳巨網於船尾獲
魚多至千頭東望角里而止不能登岸吳興丘大祐竹枝所云郎如湖
裏泛艤船逐浪隨風不到邊是已船人生子仍課以書具束修延師白
金必三四鎰女子塗妝縮髻臂金跳脫拽蓬船中雞栖豚柵塵所不有
昔皮陸松陵唱和天隨自謂矢魚之具窮極其趣竊疑兩公未曾觀此
其中漁具尚多定不
止襲美所添而已

秋百晏起作

風葉喧宿鳥露草竚晨光無營偶晏起杲日臨我堂衆
卉爭小妍貞脆分有常既得娛君子亦各全其芳時哉
歎遲暮孤節諒所當

吳嘉紀 五首

嘉紀字野人泰州布衣有陋軒詩集

贈程彭

末俗慕繁華衆人悅雷同城中與四方相效何時終廣
陵侈尤甚巨戶如王公食肉被紈素極意媚微躬歡樂
成惜愚不幸財貨豐我愛程仲子矯矯魚鹽中春草野
萋萋內有幽蘭叢何以別氣味君試臨清風

送吳慶

去年同送客載酒入菰蘆松柏露筋廟波濤甓社湖春

風幾人到暮雨一舟孤明日孟城泊知君憶老夫
宿白末邨

黃葉樹頭下北風溪上涼邨孤愁獨夜人老適他鄉水
店飛螢入秋田晚稻香故林望不見葭菼暮蒼蒼

過史公墓

纔聞戰馬渡滹沱南北紛紛盡倒戈諸將無心留社稷
一坏遺恨舊山河秋風暮嶺松篁暗夕照荒城鼓角多
寂寞夜臺誰弔問蓬蒿滿地牧童歌

玉勾斜煬帝葬宮人處

莫怨他鄉死君王也不歸年年野棠樹花發路傍飛

呂茂良 一首

茂良字仲音崇德人貢士有蔭芳園集

訪友西郭留飲草堂

金風吹急井梧稀訪舊郊原一叩扉商略枯荷包冷飯
丁寧吉貝補秋衣亦知東海栽桑近應訝南山種豆非
不用尊前更拘忌漢陰遺老已忘機

呂瞿良 二首

瞿良字念恭更字耕道崇德人有後死集

題仲兄邨居

負疴因避世聞寂此荒邨卜宅斜臨水扁舟直到門隔
籬供芋栗在野察雞豚取次幽期熟真嗟市井喧

西湖柳枝詞

白公隄畔段家橋垂柳垂楊拂画橈二百年來歌舞地
一時回首晚烟消

陳恪一首

恪字子肅一字威如嘉興學生有瞿菴詩草

九日風雨作

風雨淹重九幽人得自娛東籬花罷采下若酒停沽已
免題餠字真成潑墨圖登高何處望新漲滿江湖

劉雲二首

雲字師望長洲布衣有劉氏詩存

詩話師望詩體清
剛原出牧之東野

秋夜讀書

澄懷坐清夜虛堂生早涼遙岑吐明月天地皆秋光此
時開我書心魂肅尋常古人不可招千載徒相望

九日懷楊明遠

今朝九日風雨急澗水活活喧戶庭青山可望不可即
綠酒獨醉還獨醒籬落黃花自灼灼高天白鴈何冥冥
故人夙約又虛度日斜剝啄還驚聽

鍾曉二首

曉字人雅或曰淳厓不知何許人崇禎末流寓

崑山以醉死

詩話人雅混迹駟僮屢易姓名食鮮一飽而行吟不輟見巖牆墜粉輒
以所作題壁窠書人爭惡之夏日沉飲大醉溺水死葉文敏公撰獨賞
集錄其百篇謂風神絕
俗比於初日芙蓉云

觀海

窅窅東南無際天秦時男女漢時船已疑徐福非方士
復訝孫恩是水仙運石漫勞隨弱羽驅山須待借長鞭
何人汗漫乘風去花發鶯啼不記年

春愁

虛館春愁鬢欲彫更緣多病暗無憀笋思出土猶藏甲
柳學迎風漸折腰盡說黃金長不壞那知碧血最難消
何須西上蘇臺望一笛殘陽舊六朝

夏古丹

一首

古丹不知何許人或云越人胡姓析姓為名往
來吳興礫山卒葬龍興橋畔有葫蘆藏臺

詩話古丹與吾鄉吳興許可黃項上舍子毗結契是亦湖海之士詩如
春風明目動柳色上吳船時雲一束山腰白秋色無多樹杪紅非下里
也

春草

王孫歸路不分明愁積天涯到處生怪底女牆遮不斷
春風吹上越王城

顧子予

一首

子予吳人未詳其名有八水齋詩草

送管駟卿游白門

不共扁舟去騎驢獨遠尋江分吳地闊秋到石城深明
月他鄉夢新蟬客路吟幽期歸莫晚菊酒待同斟

屠廷楫

五首

廷楫字東蒙嘉興儒學生有待旦齋詩橐

詩話東蒙素心人樂天知命不戚戚於貧賤風誼之美可勵薄俗詩亦有柴桑遺響

煙市

初陽散朝靄曉色連州鄙延首雙溪西萬家但一氣晨
雞闌闌開夕鐘闌闌閉舜跖同營營大哉飢渴計化城
良非遙茲焉足小憩試臨濠濮上靜觀白鷗意

馬蘭

馬蘭不擇地叢生遍原麓碧葉綠紫莖二月春雨足呼
兒競采禰盈襖更盈掬微湯涌蟹眼辛去甘自復吳鹽
點輕膏異器共爨熟物儉人不爭因得騁所欲不聞膠
西守飽餐賦杞菊洵美草木滋可以廢梁肉

米蠹

之蟲在園內我可憐蟲各食天地物等使飢腹充我
家八九口強半雜兒童日須五六升我計亦已豐恣汝
所食噉黽勉必汝供但恐秋風來餅罄罌亦空我飢固
常甘汝徙將安從

秋邨雜詠 二首

背郭龐公宅秋風長薜蘿琴書存斷闕戎馬少經過廚
欲同香積門寧直雀羅躬耕與挾策所得兩無多
東菑收霽雨茅屋上新煙暝色林梢盡秋聲郭外先感
時紈扇屏隨意葛巾偏坐對山花晚淒涼憶去年

錢 熙 一首

熙字漱廣嘉興縣學生有思存集

春日風雨

小屋高林雨氣微游蜂衝濕負香歸可憐樹樹花千朵
剛被春風一日飛

沈之琰 一首

之琰字琬倩吳縣人崇禎中內閣辦事中書有
退翁遺稿

西湖

做雲澹澹碧天空叢桂香生細細風百頃西湖一明月
身已在廣寒宮

睿 一首

睿字英袖海寧人有西園集

秋興

百萬貔貅戰力微城南秋士旅魂歸陣雲薄暮迷征騎
落日西風偃大旂幾見道通司馬檄徒聞血污侍中衣
秦關漢塞音塵絕聞道南昌又被圍

郭良史 二首

良史字野臣益陽人都御史都賢之子有燹餘
快游佃香齋諸稿

菱婦行

昔菱婦夜牕雨今也殊罷機杼昔菱婦但短髮今也殊
施六珈昔菱婦恒潛身今也殊出拜人昔菱婦出辭緩

今也殊訴夫短

朱仙鎮岳鄂王廟

鄂王自分黃龍飲誰料朱仙拔戰營信誓河山歸狴犴
古祠松柏付鷓鴣悲來涕淚無今古事去君臣失合并
辛苦中原諸父老壺漿虛費馬頭迎

毛晉 二首

晉初名鳳苞字子晉常熟人有野外詩卷

詩話隱君問業於錢尚書受之魏孝廉叔子性好儲藏秘冊中年自羣
經十七史以及詩詞曲本唐宋金元別集裨官小說靡不發雕公諸海
內其有功於藝苑甚鉅韻語有和古人詩和今人詩大約
和平之音無鏤肝鉅腎之苦今從野外詩卷中錄其二律

過徐元歎落木菴

十年離舊榻賀九又重登山翠連邨合花香繞屋疑尋

僧過略約呼酒洗癭藤重覓題詩處苔封厚幾層

移竹編籬

活竹移來帶野泥安排疎影與檐齊歸鴉頓失常栖處
穉子難尋舊釣隄曉露潤生根畔草晚風吹斷隔鄰雞
老僧相伴逢迎少話到斜扉落日低

黃伋 一首

伋字細侯徽州人仕為游擊

詩話細侯畫品最高疎樹斷橋秋光
滿紙宜其有不學米於菟之句也

題畫

秋霽愛登臨歷歷亭臯路不學米於菟模糊雨中樹

東蔭商 一首

明詩話卷十七
九
蔭商字雲雛華州人

燕市逢韓雨公

春風燕市馬蹄間道左相逢並解頰小弟鄉園臨渭水
與君遙隔首陽山

蔣雯階 一首

雯階字馭閱後更名平階字大鴻嘉善縣學生

詩話馭閱海士高弟力還
正始未免為格律所拘

范季友邀飲吼山陶氏園

川原於越地風物永和時花塢陶公築蘭舟范叔移百
年新締構一代舊招提峻閣憑霄迴雕闌倚石危尊壘
傾北海詞賦溢南皮萬壑當牕見千巖向晚披拂雲歌
去緩坐月酒行遲支遁情深切劉伶死不辭人從花底
散路入夢中疑何日滄洲興重來倒接羅

姜廷梧 一首

廷梧字桐音紹興山陰人

歲暮寄馳黃

花暗春城急管吹提壺同醉水仙祠空迴南浦青絲絃
曾折西湖碧柳枝亭畔寒梅前夜發江南冰雪暮冬遲
離居悵望雙魚杳徙倚高樓有所思

徐 崧 一首

崧字嵩之吳江人

客感呈客菴禪師

日日菰城內秋深木葉稀田家綠郭住溪鳥倚山飛碧
浪圍紅樹丹厓入翠微故鄉三百里瞻望未能歸

戈如珪 一首

如珪字汝信吳縣人以孝行旌

舟泊丹陽城下

風雨疾如矢孤舟不可前離鄉身更賤作客夜如年城
古無春色沙平積暮烟吹簫人去後吳楚自山川

錢光繡 一首

光繡字聖月寧波人

題丁原躬画

依依平楚遠黏天幾點青山斷忽連春水夜來高似岸

柁樓 並柳梢煙

褚連時 一首

連時字青還嘉興縣學生

詩話青還志士丘壑不忘詩非
所務宮詞一首可以嗣響仲初

崇禎宮詞

日日南薰廣殿風
蕊缸初進海榴紅
新調於變時雍曲
詔許中書譜殿中

黃偉成 一首

偉成字位中徽州人補杭州府學生有秋鳴集

姑蘇楊柳枝詞

武丘西去接關津
長短亭前濯濯新
煙雨迷離寒食節

不須分手也沾巾

程家摯 一首

家摯字公衡歙縣人補江寧儒學生有稼室遺
橐

九日書感

天時人事謾相猜
秋雨中宵駭疾雷
民命久隨征戍盡
花枝猶傍戰場開
徒傳鶉首張仙樂
誰向昆明辨劫灰
自念暮年遭喪亂
頻看短劔引殘杯

陳鴻 一首

鴻字叔度候官人有秋室篇

題田家壁

十畝五畝園三株五株樹
荷鋤日暮歸犬吠門前路 周

士云語不求
深是唐遺響

路澤農 一首

澤農字安卿曲周人

立冬日洞庭山社集看菊

三吳秋盡不知寒
黃菊經霜尚未殘
鄉里衣裳少新製
草堂詩酒任交歡
十年旅夢悲王粲
隔代風流憶謝安
且向花前拚一醉
洞天福地此中寬

何其漁 二首

其漁字樵仲邵武建寧人 周元亮云樵仲詩有
苦思誦之音韻冷然

梅口待渡

野曠微風起白蘋邨居三里若比鄰江干風冷秋山暮
立盡殘陽無渡人

碧簫洞

石橋宛轉竹檀欒松露侵衣夜未乾三十六峰秋一色
碧雲吹出洞簫寒

程奎一首

奎徽州人貢士

詩話崇禎癸未湖廣巡撫宋一鶴敗家屬沒官有妾金陵陳氏以色藝
聞門客王屋聘焉謝參政上選先期娶之奎因作詩嘲笑一時爭傳誦
云

即事

歌舞叢中度歲華一朝忽去抱琵琶前身定是烏衣燕

不入王家入謝家

胡彧一首

彧字翁生容城人有媿林吟藁

春堤即事

芊緜翠色鎖灘頭無限煙波一望收僧舍全依雲外塔
人家半跨水中樓過橋草淺堪藏鴨近海沙平好狎鷗
多少春情供畫筆天然橫幅李營丘

趙瀚二首

瀚字砥之吳江縣學生隱居不仕鄉人私謚貞
孝先生有和雪堂草

夜泊青芝山下遇雪懷俞無殊

孤艇依荒岸濤聲卷雪來
故居洞口凍樹鎖池隈
獨剪虛牕燭頻傾濁酒杯
還將篷底夢先繞嶺頭梅

虎洞訪吳茂申不遇喜晤俞無殊徐嵩之

絕壑藏高士梅花此日尋
到門山屢換入座樹逾深
人已探雲去泉仍響澗陰
依然逢野服高詠出重林

蔣人一首

人字公凡一字昭遺嘉興人

惠陽除夕

十年當此夕強半在天涯
異地重為客殘冬未到家
歌聞蠻調苦燭暗海風斜
更見梅花發能無感歲華

杜湑二首

湑字晚實一字鄰若嘉興人

塞上

旌旗當落日絕塞陣雲橫
曉角驚寒鴈孤烟照暮城
河水驅馬渡隴草逐人行
戰骨悲沙漠年年古北平

閨思

良人遠戍玉門關十載烽烟尚未還
縱使裁書寄歸鴈春風飛不到陰山

何園客一首

園客字閻仙海鹽人

詩話閻仙貧士賣画爲活元日之作怒焉傷懷

元日

幽居鄰碧里淑氣轉青陽老畏今朝至貧看去日長衣
裳任顛倒兒女異存亡誰惜頭如雪棲棲尚道傍

姚 佺 一首

佺字仙期秀水人居於吳

詩話仙期復社舊人以景陵流派盛行特選李何王李四家詩發雕以
行然人罕有宗之者聞鵲一絕極其悽惋昔宋南渡李御史粹伯菩薩
蠻詞云杜鵑只管催歸去知渠
教我歸何處哀音亦相同也

聞鵲

何事催歸鳥鈎輶喚我頻故園經戰後歸去巷無人

陳 璉 一首

璉字虬似德清人有草亭集

藝菊

偶愜陶公興分苗和土培疎籬隨意補曲徑恰宜栽
遲暮三秋感芳菲九日開還將桑落酒重泛竹根杯

吳懋謙 三首

懋謙字六益松江華亭人

朱伯虎云六益雋上之才託跡
林泉荒茅叢篠泥水自蔽雅多
慷慨振刷濃纖譎麗之習躋於和平之音與天寶大曆鴻烈競爽
魏楚白云六益五言未盡本於建安而筋力出諸作者之上

白紵歌

美人含嬌出賓筵羅衣珮玉綺疏前華歌妙舞私自憐
雙舉皓腕趨冰絃繁聲急節凌雲烟西飛白日東流泉
春花彫落秋風旋願君歡樂及盛年

遊橫雲山作

徘徊橫山上還顧望四野黃雲西北馳清江東南瀉城

關何嵯峨山河亦豔冶俯仰心自哀悲歌不忍下時哉
不可違豈無英雄者

古別離

浮雲蔽萬里遊子暮何之尊酒送行人誰知我心悲微
風時南來飄颺桃李枝羣卉欣就榮何能及後時人生
天地間一別安可知繁霜被四野明星正參差攬衣立
前庭徘徊望所思努力君自愛賤妾情不移

王風一首

風初名翰字二飛自號廢夫宿松人

擬讀曲歌

背簪茉莉花敲斜倩郎正儂是鏡中花郎是花前鏡

張光裕一首

光裕字特儒宿松人

野望

行行日將夕驅馬欲何之地久長安遠人還太室遲接
天江霧塞撼木野風悲一望愁無際長歌采蕨詩

孫一騮一首

一騮字天卿秀水人拔貢生有硯隱居集

重過高工部寓公西園

十畝閒園舊板橋道南重過黯魂銷秋花黃蝶猶成隊
曉露紅蘭惜易凋事去英雄時坎珂年來車馬巷蕭條
靈均一去何由返空對江潭賦大招

季孟蓮

一首

孟蓮字叔房無為州人

詩話崇禎年有刊王季重譚友夏等八家詩以行者叔房殿焉今之見者非訛其打油輒以之覆醬矣從斷紙中覩叔房聞鶯作因刪其累句之存

聞鶯

林深縱屢遷亦知所止處獨自語緝蠻池塘留小住梧
桐葉底風楊柳枝上露恣汝擲金梭如何來又去

李

焯 六首

焯字赤茂嘉善人

雜興 四首

天天桃李花雜生丘墓間丘墓多陰風桃李難成妍幽

蘭處深谷草棘相糾纏亮無容光照微芳不足宣

仲冬日晷短玄雲四面垂授琴當戶坐淒風繚繞之三

變入苦節泠泠聲轉悲梁塵自零亂積雪飛參差攬袂

拭流涕玉顏不可持推琴還入房含情當告誰

豫讓易姓名漸離混傭保奇志苟不伸含垢何足道七

尺報所知百年付蒼昊豈不長苦辛所欲非壽考人生

憂患中稱心亦為好無以松柏姿零落同腐草

羲和正中天晚晚傾日車一馳濛汜間誰揮魯陽戈輕

薄游閒子車馬紛相過秉燭夜行游及時酣且歌樽酒

自言甘意氣自言多仰視北斗闡明發當奈何

東飛伯勞歌

東飛伯勞何處棲西鳥夜夜空自啼誰家窈窕當爐坐
翠羽雀釵向君墮年紀二八面發紅天桃婀娜臨輕風
落花片片東西路何由飛翻復上樹

春閨曲

碧玉堂前柳絮飛白狼河外信音稀征夫不及營巢燕
歲歲春風一度歸

魏禮一首

禮字和公寧都人

靈巖

靈巖高峙太湖東一望波光映碧空多少禪房花竹裏
游人只憶館娃宮

張履祥一首

履祥字考父桐鄉縣學生

詩話考父撰有楊園備忘錄其講學一以鹿洞為師
仁宅義根言規行矩間作韻語不洽安樂窩頭巾語

題屠處士壙邨居

霍原六聘山焦先三詔洞漁子定迷津只莫桃花種

董樵三首

樵字亦樵萊陽縣學生

詩話董生高蹈之士甲申後徙居文登海濱日荷蓀入市易米人莫知
其住處縣有紳士要於路欲與語生棄薪道左詭云吾科頭當取冠與
公揖竟去日暮不復來紳士取薪薪以歸曰此高士
所遺也生從此不復入市其詩合騷揜雅惜不多傳

詠懷三首

蘭生託層巖幽獨鮮人知正當揚葩候所遇非其時采

采桃李花乃在山之蹊豈不豔目前難免達士嗤珍重
語國香長守貞潔姿

朱明運徂謝金風來何早肅殺氣一變蕭蕭摧百草百
草不自立隨風任顛倒顧瞻芙蓉花顏色轉妍好祇恐
鳩舌鳴芳菲難遽保亦有美樅柯亭亭出物表

黃塵蔽塵市步出西郭門悲風四面至白日爲之昏
鷓鴣傍我啼虎豹向我蹲雖無啞人意其視眈眈然吾無
太陰弓難使惡鳥翻我無湛盧劍莫驅猛獸奔傍徨覓
歸塗雲煙隔通津安得貫月槎乘之入星源

巖 一首

巖字築夫寶應人有白田集

詩話築夫肆力爲古文辭要以醇樸勝若惟恐其文之上者頗有類於穆伯長柳仲塗尹師魯石守道諸家賦詩不多源本社世

送雷伯顓之鹽場

壯心銷欲盡流落又東行晚歲愁飢渴窮途別友生人
煙依海市沙鳥汎潮聲此地藏名好渾忘世上情

周 容 二首

容字鄮山寧波人有春酒堂選彙

行路難

餐晚食逾甘見疎交得久明月不嘗圓牽牛不嘗耦古
人重別離相思勝聚首

釣臺作

江潮去自杭江流來自婺兩山相縈抱誰辨江來去挂

帆過頃刻抽帆守晨暮清風不下山長拂亭前樹

李沂 十二首

沂字子化別字艾山晚自號壺菴揚州興化縣

學生有鸞嘯堂詩集宗子發云艾山與物無忤酒酣益覺溫克偶有感觸寓之於詩往往迷於神仙

家言冲雅澹遠

詩話啓禎間詩家多惑於竟陵流派中州張瓠客暨弟是客避寇僑居昭陽每於賓坐論詩有左袒竟陵者至張目批其頰是時艾山特欣然相接故昭陽詩派不墜茲聲皆艾山導之也

送陸蕙晦

挺挺梧桐樹託根泰山岑良工一朝遇斲為堂上琴我友之海上三載賞高深今當旋舊墟發聲為我吟初歌淶水曲再鼓清商音四座忽惆悵俛仰內賞心

冬日同縣圃過子發齋中酒闌登拱極臺眺望

歲暮百感集孤居增鬱陶我友久離析茲晨遠相招杯酒興未終白日隱層霄送子越煙浦溯洄乘小舸遙望城北隅高臺正嶢嶢登臨忽慷慨感此故業彫興廢在一瞬得失誰能操流淚四顧望衰草遍寒郊極目無人跡曠野何蕭條

驢

水邑資舟航利涉自疇昔居民至皓首未覩車馬跡頃遭旱魃虐洪波化原隰魚鼈悉播遷蛟龍渺蕭瑟起視四境內長耳忽充斥健者爭馳驟跛者亦努力日有數百頭清曉城南集駟儉立門戶漁利司出入穉子競揚

鞭長年坐歎息秋深連日雨河流添一尺羣驢無所施
岸草閒共斲驅之適他方散去何倉卒念此菰蘆中素
非爾所歷時事雖有然恒理不可易

聽楊懷玉彈琴歌

楊君善彈思皇操自言崇禎末年作強之再三始肯鼓
拂絃沈吟意不樂引商振角時叩宮八荒蕭撼迴悲風
天地愁慘白日凍啾啾鬼哭空庭中絃鳴指咽絕復生
曲終激烈多壯聲四座慷慨不能平楊君彈罷淚縱橫
楊君早年西蜀豪素精馬槊兼弓刀三巴健兒誇好手
一生好著團花袍是年天子開明堂臨軒三歎古樂亡
或薦楊君通律呂徑來天上調宮商鼉翻蛟躍乾坤改
垂老飄飄適東海千金囊索散無餘惟有內府琴猶在
陽山客舍長莓苔重門小院碧桃開靜檢道書春寂歷
細蕪柏子雲徘徊滄浪之水何清清波底墜雪白鷺明
布帽青鞵又西去日暮相思空復情

贈魏叔子

魏生嶽崎目如電董子祠傍忽相見豫章國士天下聞
生不逢時且貧賤東西奔走非無故側身海內求英彥
即今屠釣豈無人常恐摧頽筋力變握手數語露肺肝
別我西歸尋考槃子之往今各努力歲暮雨雪江風寒
送雷伯鰲移居樊汭

積水寒仍漲荒城海氣侵故人重避地此別最驚心野

竄名流盡煙藏釣艇深今宵尊酒意斟酌為知音

喜平菴病起

憔悴緣兄病冬深喜漸蘇自來簷下曝不用小童扶老
被文章累貧愁藥餌無憐才二豎子有意活窮儒

邨夜

野老茅堂外中宵倚戶看一輪明月墮萬里大江寒魑
魅青林嘯蛟龍碧海蟠愁多不成寐風露夜漫漫

夜

委巷人聲寂高齋夜氣清亂鴉塗暝樹列宿動寒城漏
遠聽頻斷燈殘剔乍明鬢邊霜雪滿慚媿學長生

客舍遣懷

江城畫角起高秋漸覺霜威冷石頭長夜河山羞短鬢
故人風雨入新愁庭空野水蒹葭老歲晚他鄉芋栗收
頗怪薄遊成汗漫朝朝天際有歸舟

采蓮曲

蓮塘三十里四面起清風鴛鴦飛不去只在藕花中

張鳧客至自河南

布衲蕭蕭物外身亂歸梁苑幾經春只今誰似張公子
遠歷山川為故人

雷士俊

六首

士俊字伯顛涇陽人僑居江都有艾陵詩鈔

欲雪

今歲愁多雨冥冥此夜陰風依寒樹起月隱暮雲深已
覺河冰合還看柳絮侵酒酣應有作自付惠連吟

廣陵送姊夫張六息歸關中

二首

君又故鄉去惟予尚未歸丹楓飄颯颯白露冷霏霏歲
月衰容改兵戈短札稀三杯岐路別相對淚沾衣
楚塞風塵暗秦關道路長離情同此日會面更何方警
急新烽火蕭條舊戰場中原經到處眺望幾淒涼

安豐九日即事兼寄王築夫

無處登高去柴門只畫關遙知同學侶應已上平山僻
地黃花少佳辰濁酒艱牀頭書幾卷坐誦破愁顏

哭六弟敬直

今日吾昆弟堂前少一人姓名登鬼錄魂魄寄江濱素
幔侵寒月丹旌落暗塵空閨遺一女嗚咽淚沾巾
高堂垂白父老力已難支每飯常防鯁衰年再哭兒蕭
蕭秋葉落浙浙曉風吹稻熟新應薦愁看滑滿匙

陶

澂七首

澂字季深寶應人有舟車集

入壺口關

地絡蟠三晉關門控兩河舊傳山國小新築塞垣多候
吏無烽燧居人有薜蘿不圖天下脊今日馬蹄過

送客之武昌

勝地推南郡空江接大荒樓船倚橫吹山郭閉殘陽濁

酒當壚滿嘉魚入饌香相過正春盡煙樹各微茫

汎陂

久愛南陂好今乘放鴨船
澱紋元不定菱葉正相牽
細雨侵衣濕迴風著帽偏
紅葉易零亂鼓立最堪憐

江陵過龍灣市

近日三鷗寺誰參百丈禪
樹猶依斷壁花不散諸天小
市方祠鬼荒湖忽聚船
歸塗望城郭重沓夕陽邊

兗州曉發

郭外連山暗林間宿霧收
信知東郡好何處覓南樓

故宮詞 二首

水殿風搖楊柳絲先皇朝罷獨憂時
抽毫却寫賢臣頌

面敕中涓賜主兒

自注故宮人左氏今為民間沈永婦能言掖庭舊事云宮中稱皇太子曰主兒

慈寧宮禁老莓苔元日驚傳法從來上下隔簾遙拜畢

六龍飛輅一時回

懿安張后居慈寧宮帝朝后不相見於簾內答兩拜

姜安節 一首

安節字勉中萊陽人給事塚長子給事葬戍所

安節因徙家宣城居墓傍卒同人私謚曰孝明

有永思堂詩鈔

泊寶應

河伯由來悍秋霖勢更張
屋沉餘井竈樹滅辨微茫
萬里湖天闊千一穡荒農家無住處
草舍架官塘

明詩綜卷八十一上

小長蘆 朱彝尊 錄

義和 吳寶庚 緝評

王 翊 三十四首

翊字介人嘉興布衣有秋槐堂集

周青士云崇禎之季詩歸盛行人沿

竟陵流派介人崛起禾中惟唐音是尚惜知已寥寥既窮以沒伯道無
兒若教不祀良可悼也 沈山子云介人所居止破屋一間種牽牛小
庭中曉露未晞即對花吟詠日課數詩奇精詞曲有紅情言榴巾怨
詞苑春秋博浪沙諸傳奇頗慨恍自喜遺藁多逸僅存百一而已
靜志居詩話介人初擅詞曲後研聲詩志取多師不遺偽體其論詩於
合處見離于離處求合啓禎之間大雅不作毅然以起衰自任而知者
寥寥惟平湖陸職方嗣端心賞之嘗訪君於長水值君洗硯河頭挾之
登舟家人不知也遍游苕霅乃返既而入越謁陳推官卧子方置酒送
客君詩有前路夕陽外行人春草中之句卧子擊節曰此今之高三十
五也為序其詩詞遭亂所居不戒於火惟餘小屋二間一供婦爨一吟
詠其中有故人官府寮者造之不見尋卒于京口五言如江湖長至日
風雪上方山驛路通秦遠峰陰入晉多杭柳千樹雨瘴霧百變天日氣

淫秋雨嵐光變夕曛楓林依水盡雲物近秋多一二故人在飄零佳訊
稀江山雜白下人物近黃初山雪行人少江梅臘月多文章身後事丘
隴夢中山白社遠人日夕關閉子雲江山開一望吳越在孤舟七言如
夜月旌旗五馬渡秋風草木八公山周道秋風行黍稷漢宮春雨長蒲
桃西蜀喻通司馬檄中山蒞滿樂羊書秦塞忽驚三月火漢家空待貳
師功三月晴風高戰鼓九江春水下樓船鑄語高華此方虛谷所云律
也

銅雀謡

銅雀來起高臺銅雀落高臺作銅雀飛臺成基

天桃 三章

灼灼天桃花于中林顧子惠我寧不嗣音
天桃灼灼花于林薄遲子不至憂心鑿鑿
陟彼南岡晨露瀼瀼匪岡則高我心孔勞

登臺

日暮登臺秋風鴈來慨然念遠離居寘懷躊躇千里靜
一言勞思爰有旨酒斟之酌之拔劍高歌哀音孔多沉吟
忽斷中心奈何繁星告夕薄寒求衣明月不墮輕霜自
飛稽山之東大海處之衆水所歸曾不盈而逶迤今古
山川屢更嗚呼往者實多于生

民兵行

朝廷徵民兵移文下鄉縣縣官承選募抽丁悉貧賤含
悲釋耒耜努力負弓箭未諳邊塞苦先絕室家戀臘月
到漁陽飛霜割人面來朝兩軍合生死期一戰吞聲告
同列封侯爾何羨

牧牛詞

二月三月春雨晴渚田水暖芹牙生牧童驅牛出原隰
細草青青牛可食夕陽短笛不見人吹過邨南又邨北

園桃

春花爛熳開春鳥間關啼一朝坐見物華改鳥聲啼盡
花成泥園中桃須老園中樹莫遣隨風到處飛飛出園
中去

休洗紅

休洗紅洗多紅漸失曾記初著時人矜好顏色徒傷未
敝成棄捐悔不作事慎從前

烏栖曲

深宮烏啼天未旦城頭擊鼓明星爛吳王宴罷星未稀

敏系霜落樹烏驚飛

官船曲

二首

隴中水勢急與石相抵梧月暗富春山官船乘黑去
山家畏虎狼日斜閉門卧向夜官船來捉人嚴守邏

靜夜思

虛帳含秋月高樓怨別情明河一萬里夜靜水無聲

長干曲

揚帆下長江日落秋雲起夜半聞鄉音知是長干里

江皋曲

為愛新妝好東皋出采蘋春江千里色解珮不逢人

會稽竹枝詞

秋風秋雨正淒淒
荷葉荷花香滿溪
越女蕩舟愁日暮
歌聲盡在若邪西

楊柳枝詞

春寒殘雨日瀟瀟
一曲驪歌上灞橋
想到啼烏今夜宿
不教攀折最長條

清涼山寺

蒼山樹如蓋
乘高御清涼
地遠暑亦寒
江色明虛廊
層崖仰萬象
古寺崇榱梁
眼迷金銀界
鼻擁梅檀香
白雲照巖穴
有若日月光
極視但長嘯
凌風思翱翔

寒夜談遷至

故人越江海
細雨連孤舟
叩門告飢乏
刺刺語不休
自從遠游歸
中途歷窮愁
豈無相識人
埽迹如仇讐
腹值今日飢
問余能食不
聞之發長歎
誠爲吾道羞
青眼古所難
况於末世求
伊余雖苦貧
一飯君必留
中園翦寒韭
糟牀瀝新筍
酒酣兩耳熱
率意成歌謳
人生感行樂
不醉非良謀

待范四不至

落日澹清輝
幽人在林樾
回看往來路
蒼蒼翠微沒
天高秋月空
夜午星辰闕
之子期不來
長歌爲誰發

宿董氏宛委山房

中夜虎渡水
溪樹初風生
颯颯吹哀湍
衆山皆有聲
深庭久無月
黯然三四星
憂人獨求醉
釋此離居情

王貽上云警拔

傳可

寄沈十二

橫山生白雲鬱鬱半空起知君住其下獨宿白雲裏冬
月靜巖扉寒泉滌心耳嗟余役風塵引領望之子

王貽上云及格

江亭遇舊

老畏干戈滿愁聞羽檄頻鶯花射堂夕風雪故園春泉
下悲先帝人間識舊臣空將垂白淚嗚咽對沾巾

二十七夜見月

纖月依微見愁人起四更暫時成死魄幾日又哉生花
霧冥冥重星河湛湛傾鄰雞催薄曙知爾有同情

四十初度

不才吾老矣萬事一蹉跎今日尚如此他年知若何空
囊初罷酒樂歲且狂歌每欲尋巢許無從訪薜蘿

送客還山右

春草太行山行人一騎還夕陽前路遠離夢索居閑鳳
舉今誰匹鴻歸不可攀所悲流水意千里送潺湲

石城晚眺

客心正搖落獨上石頭城天遠垂垂下江寒混混平愁
兼多病日老作異鄉情況值秋風後清砧急暮聲

獨樹寒烟外孤邨流水間偶隨花草去遠逐漁樵還川
暝罷垂釣日斜長掩關何年事高隱歸卧鹿門山

周青士云全學

去越

步出越城門回看越城樹久客成故鄉徘徊不能去

客中九日

細雨成陰近夕陽湖邊飛閣照寒塘黃花應笑關山客
每歲登高只異鄉

沈山子云
不失唐音

亂後得張子書

沁園秋草舊回車惜別西湖歎索居萬里河山經百戰
十年重到故人書

露筋祠

野岸分流截海垠安歌誰復賽波神孤舟夜向祠前泊

商女挑燈說露筋

漂母祠

一飯當年報所知王孫今日更何之平生自歎無知己
千里來尋漂母祠

維揚逢張子

輪蹄自送出吳關楚乙燕鴻信不還誰料十年兵火後
故人今日在人間

夏錫祚 五首

錫祚字玄寵別字書巖長洲人補崑山縣學生

有雪鴻堂詩草

詩話書巖五
古居然作家

化城菴舊是趙凡夫隱居處

入門無寸土起伏盡崖石其中窪者泉一一湛寒碧稍
加斧鑿功構此幽人宅不忍山骨傷廬舍寧取窄崇卑
就石勢為磴亦為壁雖行密室中犖确響行屐軒廊倚
斷壑渡以橋盈尺昔人栖遯處遠與市塵隔今為佛子
廬筠籃有游客是時春事動山氣潤泉脈環轉軒櫺間
漸聞聲澹澹岑樓面青巘飛翠坐來積西牕杏一枝鮮
妍合画格尚想寫生人玉臺去無跡

謂文夫
人傲也

空山萬籟靜

鐘磬響晨夕

自紫蜺澗至旋螺頂

荒蹊渺人蹤樵路僅可辨忽焉耳官清泉聲泠然善入
谷山四合仰視天一綫陰陰冷翠滴竹色綠人面泉行
如秋蛇赴壑隨所轉迴磴或阨之怒歎亦飛濺偃木傍
石梁渡客攀援便故令坦塗隱不使門扉見路窮出階
墀曲折趨古殿苔衣鹿胎斑亂點落梅片巖阿架精廬
清闕獨所擅幽意領已永奇勝探未徧復尋來時路一
步一繾綣夕陽照歸人紛紛下華甸

鄧尉妙高峰

茲峰昔言峻豈意乃平坦倚竹為幽深徧植萬竿滿蒼
蔚四面來不使濃翠散春時此天地未屬鶯花管相去
叢林遙所喜游蹤罕法侶罷逢迎經過便疎懶勿嫌坐
箕踞我佛亦偏袒第損趙州茶一喫至七盃豈惟小住

佳直可適予館

度風篁嶺至龍井

不知何年代人家猶太古叢篁高百尺深密掩邨塢寥
寂絕人聲濃綠滴環堵徑轉下坡陀丁丁響樵斧道旁
萬松樹落落清可數叩門墮山翠竹裏僧開戶呼童汲
新泉泉自石穴吐烹以淪茗牙炒焙初出釜客言香色
絕僧意不自詡乍與佳勝辭迴顧失紺宇樹密天疑陰
泉吼聲帶雨忽聞遠邨雞有路出漁浦

詠龐德公

風塵擾天地不到漢沔東至人所栖息山靈護微躬力
田自歿晦婦饁耕者翁羣雄戰四野雲表翔冥鴻靜中
有定鑿人倫識統宗詭辭對景升遺安樂貧窮豈知天
下事已付南陽公方其拜牀下深意默已通漢燼既可
噓匿影歸龍從采藥入鹿門世莫知所終神龍不見尾
雲霧深濛濛

顧 卍 三首

卍字琢公一字山臣錢塘人有今年草

詩話山臣工繆篆詩不為格律所縛持論亦復不羈家居奇窘有桑門
勸其修行以資來世福山臣笑曰不知前身是何雜狗作之孽使我今
生窮苦若從上人修行又不知來世是何雜狗安享
是福傳者以為笑端然正可發愚夫愚婦深省也

有夏

淫雨積洪滂八十有八日是月月小盡九十日餘一所
剩無幾時夏令倏云畢陽光久淪滔陰慘恣騰溢龍蛇

起平陸鬪水入人室翳此白晝輝恐為魑魅叱阡陌匯
為海何有蓬與華人非金石軀浸寢自腰疾赤帝職烜
赫位莫與甲乙豈問大火亡秋冬竄為質江南號炎方
古語亦妄述土山焦欲流說者第誼譎彼蒼奪農夏豈
有富民術無已請端策筮卦十之七其占不濡尾是日
卜乃吉無何若木枝影向意表出朝光被畎畝疆理辨
溝洫鉏耨四五動田父不終逸時還衣我葛饑也樂我
泌譬之出幽谷暗吻忽自失又如殿後師師老撫軍實
取勝在一伸安問嘗九紕無夏忽有夏有夏乃有秣有
秣且釀酒以醉契玄謐

江臯

江臯有梅梅有枝青樓悅君君不知水郭舟喧趁潮去
月落沙禽啼滿樹

夜思

疎雨乍過菡萏陂好風微動楊柳枝前溪後溪櫂歌歇
夜半水明飛鷺鷥

陳道永

二首

道永字非玄更名確字乾初海寧學生

詩話先生難經鏗鏗
詩不求工然亦流暢

東董子

春風亭子雨迷離旅思紛紛憶舊知別去好山游幾處
倦歸蕭寺記何時期君南閣尊前話看我西湖隄上詩

莫謂兩人容易見滿頭白髮已如絲

偕吳仲木再游西谿

秦望歸來興尚賒幅巾筇杖入山窪迷離不記前朝路
寂寞還開古寺花春水橋邊雲萬樹晚風亭外月千家
可憐潦倒吳公子頻道西谿勝若邪

孫茂芝 一首

茂芝字若英嘉善人有燕游橐

江南曲

少小住江南忘却江南好辛苦北游還喜見江南道

禹魏

平云口頭語却佳

蔣之翹 一首

之翹字楚穉秀水布衣甲申後隱于市

詩話楚穉居射襄城詳對楚辭晉書韓柳文集鑿板以行又輯樵李詩
乘四卷搜錄鄉黨先正詩無遺兼能備舉軼事使聽者忘倦晚年無
子書籍散佚無餘
詩乘亦亡可歎也

泊

止櫂知何地攜藜復有邨落花緣艇出鬪鴨近人翻未
乞田家火先邀野老樽百年知幾醉潦倒復誰論

沈自昌 一首

自昌字君克吳江人禮部主事琦子國子監生

客夜聞笛

為夢西洲蚤閉門高樓橫笛正黃昏關山風月愁清夜
楊柳梅花憶故園波起湘江飛落葉雨淋蜀道叫哀猿

沙場多少征人淚一曲吹來欲斷魂

沈自然 三首

自然字君服吳江人副使琬子居母憂不勝喪而卒其友私謚孝介先生有來思閒情二集

江南樂

初景爛銀浦溘溘浮灘鶻儂情兩搖蕩持比春江色江深蓮子齊水暖鴛鴦栖不須更相問家住橫塘西橫塘連夾浦曲曲明如許誰打白蘋開前溪夜來雨雨霽上南樓天高水影浮出門郎不見仍蕩采蓮舟

曉別曲

月沒星闌曉雞唱離人催起同心帳殘膏無燄淚花紅不語含顰兩相向安得紅輪葬海底千年長伴多情死從此人間無別離門前不種相思子

寄居湖上樓

藕葉將凋桂葉濃隔湖隱隱見雷峰獨松關口秋聲急并入南屏寺裏鐘

沈自徵 一首

自徵字君庸吳江人亦副使琬子辟賢良方正不就

詩話沈氏多才自詞隱生璟訂正九宮譜為審音者所宗而君庸亦善填詞所撰鞭歌伎灞亭秋諸雜劇概嘗以據世有續錄鬼簿者當日之為第一流詩則嫌其稍平衍也

和施壘山學博送別韻

首荷闌干春漸肥榆關滇海鴈書稀管城亦有封侯骨
磨盾看君試短衣

沈自友 一首

自友字君張吳江人都御史珣子承父蔭入國
子監有綺雲齋橐

平沙灘

雲淡迷遙樹沙平障晚烟亂帆爭破浪斷岸遠連天野
渡傷歸客斜陽冷釣船荻花風起處聞鴈獨淒然

徐韞奇 一首

韞奇字季華吳江人有西濛吟橐

田家樂

水遶莊窩竹遶牆宛然風景似柴桑雨來大芋高荷夜
秋在鱸魚蓴菜鄉戶外最憐楓葉赤籬根也有菊花黃
東鄰穫稻西鄰秫勸我先營碌碡場

魏廷薦 一首

廷薦字友莊嘉善人有息踵居詩草

家子一畫淵明采菊圖見貽戲作

茅屋四五間修竹一二畝東籬繞曲折南山安戶牖芙
蓉既盛開菊又當重九此際陶淵明寧無人送酒

徐開任 二首

開任字季重崑山人有愚谷詩橐

朱長孺云季重詩原本少陵深情至

性激發而出使讀之者留連往復而不能自己

咏史

新都居攝時符瑞日盈耳不有翟將軍人心俱已死移
檄建義旗威名震遐邇時命雖不成稱兵從此始悲哉
兩黃鵠無人卹義士

送人游下邳

江南春色不勝情俠士辭家事遠征天下侯王寧有種
世間豎子遂成名故交亂後無同志羈客愁時有定盟
豪氣未除淮海習知君此去慰平生

屠 曠 二首

曠字闇伯嘉興縣學生有勗齋集

詩話闇伯言無枝葉行有規矩詩亦雅正不以風華見長

古意

素絲非一絲機中織成帛卷舒生容光從郎自搖壁慎
勿染為緇終身不見白

贈別袁重其

高飛鴻鴈滿關河此日寒江起夕波庾信哀時常作客
梁鴻去國獨行歌霜淒茂苑清砧急月照荒臺落葉多
為問吳中舊知己空山叢桂近如何

孫 治 二首

治字宇台仁和縣學生有集

詩話宇台刻意摹古寧質不佻

渡漳

河北臨大水清漳還濁漳草迷銅雀綠沙走直沽黃疲
馬愁荒渡飛鳥逐野檣比來憂汎濫何計築渠塘

與關六鈐

故人栖託近如何聞道玄亭自詠歌梅福游吳辭宦久
虞卿去趙著書多秋風絕塞來鴻鴈白露寒塘遍芰荷
君意陸沉堪寄傲獨慙年歲轉蹉跎

張彥之一首

彥之一名慤字洮侯松江華亭人

朱朗詩云洮侯為人寬博無同異其

詩蒼蒼不事繩尺質本景純而臻于嗣宗

擬古

小鳥愛初陽交交鳴條柯皎日麗牕牖忠風揚薜蘿蘭

蕙豈不懷馨香隔巖阿所思悵道遠軒車寧能過仰睇
浮雲馳志意成蹉跎烟海既迨遞雲峰亦嗟峨百年會
有盡日暮徒悲歌

馮班十首

班字定遠嘗熟人有鈍吟集

錢受之云定遠詩沉酣六代出入于温李小杜之間

陸勅先云定遠詩敦厚温柔禮麗深穩美刺有體比興不渚無字不有來歷詩話啓禎詩人善言風懷者莫若金沙王次回定遠稍後出分鑣並驅次回以律勝定遠以絕句見長大都次回全學温李而定遠多師其源出于才調集也

戲題四韻

三十六鴛鴦輝輝滿路光花衫迎日薄草帶引風長不
隔車中笑從飄過處香專城方四十年少不須狂

游仙詩

四首

書邀女伴看桃花三鳥回時滿地霞記得明朝是丁卯
青童又合上東華

紅桂開時試舞腰素娥爭換白鮫綃歸來更按鈞天曲
吹裂真妃碧玉簫

貪看對奕不歸家誰折當門玉樹花特勅雷公往追取
半空鞭下阿香車

玉洞桃花又爛開等閒相望隔塵埃劉郎也似山中水
一到人間便不回

無題

叢桂風多起夜遲柔腸已到九迴時瑠璃牕外姮娥影

喘殺吳牛自不知

雨霽

溪水溶溶拍野橋薄雲開日露林梢不知一夜前邨雨
多少春泥上燕巢

梅花

長廊盡處是東牆柳絮風中見謝孃今日不堪簾外樹
一枝和粉弄殘陽

立春日

梅花拂拂柳參參半夜春來睡覺酣曾向羅敷牕下坐
最思朝日到東南

題畫

柳花飛盡綠陰肥
雨到濃雲濕不飛
邨酒正香茅屋小
漁翁閒却釣魚磯

董

說

十二首

說字若雨烏程人晚為僧名南潛字寶雲有豐草菴等十八集

詩話若雨腹笥便便未免有才多之恨至其硬語澀體絕不猶人方諸涪翁不足比於饒德操有餘

讀曲歌

歡是嶺上雲朝往暮來過
斜陽照殘雨儂處獨晴多

清明竹枝詞

碧紗轎駐水塘灣
楊柳風吹燕尾鬢
要赴燈前絃子社
莫攜儂上虎丘山

南邨秋鬼謠

妖狐拜月霜花青
鬪驢騎馬空中行
秋魂吹作塔鈴語
叫斷東流一溪水
鬼車曉喚精靈去
綠燈移過江楓樹

孟蘭招魂詞

靈風飄幢塔鈴語
小玉魂歸立秋渚
只言夜踏陽臺雲
蒼茫乍隔青楓雨
擁髻來看水燈綠
法王正奏無生曲

春日

煮茶烟透綠陰中
遮屋黃茅間瓦松
但遣異書供研北
不妨野語聽齊東
香拈細雨招新夢
門閉春風仗短童
秋色今年應更好
小牕移得碧梧桐

山行

落日射背木葉滑橫挑拄杖懸詩囊海天二月發新翠
野廟斷烟生古香洞口楓樹根可坐山腰亭子名難忘
垂藤松鼠忒孤僻纔遇游人竄道旁

西溪客過期不至

往昔刻約言不食此回遠游心已貪夜來坐到露花滴
更復望君蓮葉南眼底青天星四五夢中破琴徽十三
豆棚放語自清絕莫待霜落分黃柑

蠶豆

誰賦田園雜興辭琅玕記取夏初垂喜看桑底懸新莢
恰值蠶眠未吐絲細雨賣茶聲過後竹爐燒筍火停時
沙餅漆欄分前詠豌豆今逢第二詩

秋夜吟

人行積水涯踏亂青松影吹滅秋牕燈月白飛光冷

夢華潭口聽客話嘉隆間大內舊事記之 二首

月華門外轉靈旂照夜銀盤碧藕肥祠罷天孫桐葉落
君王新賜鵲橋衣

江南風景藥王灣霧縠單衣綠玉環紅芍藥邊碁局罷
自裁團扇画秋山

秦良玉詞

追奔一點繡紅旗夜響刀鏢匹馬馳製得鏡歌編樂府
姓名肯入玉臺詩

何述稷 一首

述稷字公藝嘗熟縣學生有晴蓑草堂詩集

苦雨

客舍淹淹雨春愁甕裏天竹含千嶂霧柳罨一溪烟凍
鳥翔還下飢蠶起乍眠茅茨鄰酒熟慚媿貫無錢

朱扉一首

扉字開仲嘉興布衣

詩話開仲弱齡多病終其身不婚獨處深邨破甑勞新
手自執爨間賦小詩不輕示人簡吳生一律與會自如

簡吳生

自誦梅花人日詩五句不見但相思一春多雨愁無麥
二月輸官定賣絲行藥橋東逢客返著書牕下少人知
近傳孺子司邨社想見麕豪割肉時

金德開一首

德開字爾宗蘇州嘉定人國子監生有詒翼堂

詩

紅葉

濃綠看初改江頭日漸紅寒生一樹早秋老萬山同最
豔朝霜後尤妍夕照中自能成晚興不欲媚春風

奚濤二首

濤字大蒙崑山人有肆閒堂詩草

雨霽自光福至玄墓

幽尋無定期興發及新霽移舟入林烟登歷從所契杖
策踰山橋淙淙澗流細蒼松夾道深修竹分籬翠草甲

抽故心梅香有餘蒂登高一憑眺湖水白無際微茫水
鳥翻斷續雲峰繼有懷云誰思榛苓徒款睇

舟行即事

蠶月江橋外荆扉八九家鶯啼兩岸葉雨漬一籬花溝
響新流細門抽穉竹斜邨農行漸少無處問桑麻

胡山 二首

山初名日新字天岫宜與人僑居海鹽徙嘉興
梅會里

與彭仲謀

武原吾舊住結屋近滄溟鹽井縈沙曲魚風入市腥秋
雲蜃浪黑夜雨鬼燈青會有乘槎興還尋織女星

題畫

漁家背山郭門掩青楓樹夜半潮水生孤舟渡江去

李麟友 三首

麟友字振公一字于苑嘉興布衣

沈十二以匹練見遺賦謝

梅溪李生長衣褐冬亦不加夏不脫已經寒暑六七年
領衽不完襟縫豁沈郎好我情不疎贈我匹練五丈餘
製以爲衣見賓客舉止覺與常時殊鄉人重衣不重德
談笑從今壯顏色

客夜

夕陰山翠重寒色上河橋夜雨三更鴈秋風八月潮官

明言總卷八十五
十
亭人寂寂驛路馬蕭蕭
裘敝經年客歸魂不可招
登審山有懷周筭沈進諸子

長水通梅里橫山近
硤川登臨猶可見惜別已經年
葉落清秋樹鴻飛薄暮天
故人無恙否却望一淒然

劉純熙一首

純熙字晦生慈谿縣學生

日暮

牛羊下日夕素月柴門生
宿鳥樹高下微風雲重輕
孤邨轉聞寂萬象歸虛明
地僻無鐘磬惟聞泉夜聲

胡嗣璜一首

嗣璜字暎日平湖人
有墨龕集

秋泛

舟痕移處一溪涼
柿葉初紅豆葉黃
不獨蓴鱸秋正美
邨醪也自發新香

程用楫八首

用楫字濟臣休寧人有遜敏居遺草

詩話濟臣詩清真
堅老卓然名家

雨宿桃源菴

夕雨四山來奔灑
萬松裏卧聞藥洮泉
激激聲不止道人然
松膏中夜更坐起
何處一燈青
明滅深壑底
曉看白龍潭
應添數尺水

慈光寺

神廟賜額

白雲斷峰腰峰下亂松枯盤盤一徑盡金碧見雙闕飛
閣跨虛空長廊翳修樾風箏四角鳴香氣諸天發緬昔
普門師王城走餅盃道感帝后尊帑藏賜禪窟幡幢內
家製像設天宮豁鬱鬱慈光書銀牘何飛越人代復幾
何下界事飄忽豈惟陵木拱講席亦消歇我憩娑羅陰
窺牕牘梭拂三歎出寺門幽篁吐微月

月夜宿院中小閣

暝色起平坡鐘聲滿山戶一禽忽驚聒涼月已復吐牕
櫺色如水松葉紛可數樹底坐白猿鬚髯極清古

湯泉

黔山峻嶒神所家丹厓石柱攢蓮葩陰陽爐炭熱坎窟
溫水千斛流谿衍人言驪山亦畧石惟有此地根硃砂
傳聞軒帝服丹匕肌膚皴裂人驚嗟香泉一浴浸七日
白龍晝見何衙衙珠衣寶冠照山谷便跨鱗鬣隨青霞
至今玉壺酌酒處石室尚有樽壘窪嗟予清淨本無垢
追逐世好羈籠笈裹糧偶到天子郭解衣初試靈泉涯
浮丘天子不可見身輕疾愈還足誇山亭晞髮發長歎
安得躡足登雲車

喝石居

石室雲正暮溪流聲更長懶殘何處去虎跡滿繩牀下
食白鵬靜侵階紅朮香無人指歸徑獨立殘陽

祥符寺

即軒轅宮

明詩綜卷八十一
松梢佛刹金銀色傳是當年軒后宮陰殿已無丹鼎火
古壇惟飈寶幡風烟中白鶴參差下屋裏清泉曲折通
小坐山房話疇昔木蓮花發數枝紅

初冬送友游浙

江水新安淺雲山太末通行吟隨處好烏柏與丹楓

巨門樓

唐人于德晦詩云閒倚朱闌頻北望只宜名作
巨門樓遍詢樓址無一知者成一絕句

千層翠色向空浮百道紅泉石上流閒詠唐人舊時句
朱闌何處巨門樓

戴長汎一首

長汎號澄齋嘉興人有前後征草

苔溪漫步

四野干戈急蕭條此地秋村龙吠山鬼水鳥狎溪牛落
葉飛重起哀湍咽更流無才堪濟世只合老林丘

明詩綜卷八十一上

明詩綜卷八十一下

小長蘆 朱彝尊 錄

義和 吳寶芝 緝評

張鹿徵 四首

鹿徵字瑤星後更名怡亦作遺應天人都督可
太子以府學生承廕歷錦衣衛正千戶甲申陷
賊不屈受刑潔身歸隱居攝山不出自號白雲
道者有古鏡菴詩內外集

靜志居詩話山人時園中鹿亦產子因名鹿徵而以瑤星為字崇禎
間曾仕錦衣故其六初度詩云當年執戟侍明光親見彤雲捧玉皇
也山居鈔書頗多著述甚富予所見者僅玉光劍氣集渡聞正續筆數
種而已曩造其山居見案頭有手抄宋季張炎叔夏詩集一卷今其遺
書不可復問詩亦流傳者寡矣

友人移居

居市厭市躡入山苦山僻非山非市間卜茲五畝宅到
門水一灣眠沙鶴一隻遙望鐘阜巔雲霞幻朝夕乍見
兩脚沉忽焉晴絮襲主人如冥鴻高舉不可弋丘壑盪
心胸花竹恣夷憚何時載酒過爲君理雙屐

送萬年少歸淮揚

握手與子別勸子進一觴風日何黯澹道路阻且長舉
世矜中行無復狷與狂達人志寥廓世事等粃糠濯足
臨溪水散髮晞朝陽溪水日東流歸彼百谷王朝陽隱
豐蔀昏曠鮮晶光擾擾棼絲中誰爲振其綱慨彼北風
詩虛邪徒自傷

雜詩

淺水平沙路淪漣繞一邨夢回天地老亂後友朋存芳
草生幽澗新鶯語小園看山廣武後久不望中原

送葉榮木入閩

野鶴孤蹤道士顏層林千里入閩關不知烏石峰頭路
可似江南雨後山

薛 暨一首

暨鄞縣人縣學生有面牆小橐

夏日

水閣虛涼枕簟清榴花梔子覆牕明綠陰滿地日卓午
卧聽鷺黃啼一聲

陸

璉

一首

璉字茂璩吳縣人兩中武科甲申後削髮居蓮
子峰下自號了緣道人有楓江遺橐

題徐元歎落木菴

栖巖有精舍窈窕挂藤蘿天與幽人占山偏落木多連
峰當戶立一澗遶門過近有離騷作非因學楚歌

張

紀

一首

紀字齊方崑山人振德子承廕錦衣衛所千戶
桂冠歸有槩菴集

江邨春望

春風爛熳遠天涯曳杖江邨攬物華身在故鄉仍是客
心從安處即爲家貧來生計號寒鳥病後居諸赴壑蛇
更得幾年還健在青門常種邵平瓜

吳

璵

一首

璵字于庭休寧人國子監生

荅閨人寄懷

東風妝閣廠檐牙春鎖重扉樹樹花自是王孫歸未得
漫隨芳草到天涯

龔

賢

一首

賢字半千上元人

百苦

百苦不一樂中宵夢忽清有家長作客到老尚謀生牆

月背人下野風空自鳴明朝渡江水前路未休兵

楊焯 二首

焯字俊三吳縣人

秣陵雜詠 二首

形勝瞻天闕飄零問故宮金笳淮水北玉露蔣陵東百

戰黃圖盡重來紫氣空西京耆舊在辛苦說關中

西望窮牛渚中流雙闕分征帆江外斷鼓角夜深聞地

擁龍山雪天連鵠塞雲開平飛渡處寂寞百年勳

戴冠 一首

冠字我仲一名易字南枝紹興山陰人有釣臺

詩集

詩話我仲高人與徐孝廉昭法結物外之契嘗賦釣臺詩累百首託以見志哀而成集覽之未免牽率友人續示集外詩四首錄其一焉

釣臺懷古

已分垂綸老此生山田是處可躬耕遠攜仙女全家隱

深悔羊裘大澤行一夜星辰凌帝座九重貴賤見交情

請看七里瀧中水未到錢塘徹底清

張穆 一首

穆字穆之東莞布衣有鐵橋山人豪

酬客

吾本羅浮鶴孤飛東海東寧隨南翥鳥不逐北來鴻坐

愛千年樹高逾五尺童乘軒亦何苦隨意水雲中

溫良 一首

良字叔子一字散宜烏程縣學生有大愚詩豪
冬日游景谷

寒原林壑靜獨往暮雲生嶺雪兼山遠河冰激石鳴修
篁翻鳥影古寺報鐘聲塵壒無由到臨流罷濯纓

汪中柱 一首

中柱字為石歙縣人杭州府學生有光霽軒集

唐栖夜泊

停橈繫淺岸寄迹似飄萍稻黍平疇熟魚鰕晚市腥殘
烟籠古樹遠火映迴汀盍旦爾何意勞人枕上聽

陸來 一首

來字陶孺吳人

梅花

踏殘山徑草蕭蕭藉有幽花慰寂寥幾縷炊烟恒遶屋
一灣流水慣依橋寒輕籬落禽初啁春入園林雪未消
卧後參星橫夜半冷香吹夢月迢迢

杜濬 十四首

濬字于皇號茶村黃岡人有變雅堂詩集

詩話啓禎之間楚風無不效法公安景陵者于皇獨以杜陵為
師是亦豪傑之士惜其阨窮以老孟貞曜所云好詩多抱山也

游夾山漾

出塢謝羣賢放舸理長嘯烟岫映澄波始知所歷妙林
壑羅秋姿紫翠冑寒照蘋汀欲為雪楓岸忽如燒目逐
絕境往意愜佳處要層峰何嬋娟灣環亦窈窕泛漾疑

江湖回帆復蘿蔦面面見道場名山一起憑弔尋幽不覺遲歸晚顧而笑石門免見訶登樓感同調

九日一草亭時將與天章別感賦十六韻共用日

字

秋深雨廉纖意外晴此日薄雲雖未歸解散已可必危坐傷我懷雅意不欲出歛聞良友招不待盥漱畢登高一草亭豈在山翠律幽人先入座鳴琴未離鄰盤榻但隨時杯香帶橙橘暫覺百慮蠲遊從任疎密叢菊花故遲黃蕊苞漸茁籬蔓弱迎霜宛結小紅實獨感薜荔枝來時伴繭栗于今已扶疎殘陰映細帙白頭久飄零俗態如蟣蟲遙遙三令節過眼一何疾念此動衷腸匪第憶家室悵別方自茲歌笑忽如失

揚州雪

揚州雪積如山滿城乞兒盡凍死商人亦覺今年寒客子衣單資用竭偏到揚州來看雪雪下白萑萑入釜不可炊江南亦有雪江北來何爲

金山

山從南北望孤權始登臨坐覺春雲動行看水國深江流元自湧天地亦何心獨拜蘄王廟英風爽客襟

登金山塔

二首

極目非無岸滄波接大荒人烟沙鳥白春色嶺雲黃出世登初地思家傍戰場咄哉天咫尺消息轉茫茫

薄暮難爲狀空中別有聞懸燈江海合望月水天分
廓身何往飄零興不羣向來峰頂色看作下方雲

焦山

出郭來差遠憑高望獨深江分神禹跡海見魯連心
密竹藏金像回流灌石林擬尋幽絕處却誦白頭吟

芟溜舟中偶成

一雨連三月開帆趁晚晴春風吹岸草知是石頭城

臘盡還冶城寓戲爲口號

二首

淮水凍仍綠鍾山燒更青一椽來復去只似短長亭
妻孥設見嗔我信如潮汐出門必上元還家必除夕

泰州

窮海三秋盡扁舟百里行夕陽無近色偏照遠帆明

道中望棲霞

目極危巒日下春茅君廟裏幾株松心知不及中峰宿
今夜猶聞寺外鐘

佛殿

大樹風多葉盡飄莊嚴猶自見前朝黑頭江令殘碑在
不記君王舊姓蕭

白雲菴

松篁自結一幽蹊積葉柴門咫尺迷我記白雲菴去處
過山又過小橋西

方文

十五首

文字爾止桐城人有金山集

潘蜀藻云爾止詩陶冶性靈流連物態不屑章縫句

繪間有率意之作頗為學者口實不知皆嘔心刻臍而出之者也

詩話爾止間作可笑詩句頗為時論揶揄然如嘉穀登場或春或採社稷終少于粒米

田居雜詠

平生好結交雅多同契友相見輒稱詩詩罷即呼酒小飲須數升大飲必數斗家貧苦無錢質劑隨所有有時酤不得顰蹙循牆走百畝今始歸種秫先廿畝秋冬計釀數三百六十缶一日一缶傾早晏惟吾取茅堂客來過杯竿勿離手爛醉與狂吟兩者俱不朽

華不注

歷城東南隅故有華不注晉師逐齊侯三周即此處其山拔地起四面無依附孤峰秀插天娟娟入雲霧我來恣游覽艱險殊不顧磔砢千萬石上下無一樹遠望如芙蓉菡萏未開露所以名華不古人亦善喻今人罕識字相呼失其故趙李乃詞宗如何音亦誤

不音芙花跗也趙子昂李于鱗亦誤

再游焦山

匡山以續著嚴州以光名二公皆寒士千古垂英聲乃知山水性弗以人爵榮我今登茲山緬懷焦先生蝸廬僅容膝獨往栖柴荆鄰火延其居露處了不驚斯人胸臆間寧復有世情所以京江上名與匡嚴并

左蠡行

小艇迎風發星渚纔到揚瀾日過午榜人貪涉不肯停

日言紀卷之三
黃昏必抵都昌浦俄頃狂飈自西來水聲騰沸山崩摧
况兼雷雨助其勢同舟面色如死灰急曳半帆回左蠡
暝黑仍馳二十里依稀見岸不得近沙淺曾無盈尺水
終宵漂泊蘆葦邊風波震蕩誰敢眠世間平地皆好住
何事江湖年復年

吳門行

一年一度過吳閭腰下百金千金裝今年行李獨蕭索
布衣白恰秋風涼鄰舟新到惠泉酒青錢一緡沽一斗
顧我囊空無百錢仰視秋天但搔首可憐書劍老風塵
客路栖遲多苦辛明朝况是重陽節風雨飄搖愁殺人

題張大風山人松石圖

泰山上有百尺松可惜曾受秦時封蔣山下有一片石
亦受陳時封可惜世間土木本無情且以微寵累其名
士人守身若處子豈肯輕受微塵滓張翁贈我松石圖
筆意瀟灑形高孤自言此是唐宋物不是陳卿秦大夫

除夕歎

去年除夕歸自北行李到門天已黑今年除夕客南方
江路逢兵歸不得山妻凝望眼將穿只道今年似去年
高樹夕陽鴉影亂尚同小女立門前

湯氏宅

浴罷坐林中開襟受夕風巡檐驚宿鳥滅燭救飛蟲野
哭聞鄰婦方言報小童夜深微雨過點點在梧桐

攝山絕頂

下方惟見石不信有柴荆仄徑盤空上危峰到頂平夕
陽千嶺秀春水一江明愁絕浮雲外蒼茫舊帝京

章門訪陳士業故居

南州耆舊近蕭然碩果惟君亦可憐典冊高文傳海內
短牆破屋住江邊白頭不忍聞時事卓帽相過說往年
欲訪故人埋骨處亂山孤冢沒寒烟

苔上送曾青藜之吳門

歲暮來游碧浪湖愁看鶯鴨占菰蒲獨攜破笠尋山寺
稍喜貧交得酒徒往事那能如百粵蚤春端合去三吳
停舟先問靈巖路鄧尉梅花天下無

遇鄉人

君從石城來曾過青溪否我家傍青溪門前數株柳

潯陽夜泊

微微秋月照江沙兩岸楓林蘆荻花苦憶當年白司馬
不知何處聽琵琶

猷州城

陵陽山下稻花秋南陌東阡自一丘聞道沉沙多折戟
老農知是古猷州

舒谿

一灣春水漾晴沙兩岸居人十數家溪上重尋仙女廟
門前依舊碧桃花

紀映鍾 一首

映鍾字伯紫上元人

城邊路

城邊路歌舞處十年變為墓十年犁為田十年成淺渡

曾傳燦 三首

傳燦字青藜寧都人有止山集

月夜渡淮寄懷魏東房

孤舟夜趁風微波濕星漢四望無一山乃知南北判天
水搖空翠新月出西岸故人在蕪陰音書未應斷

淮陰釣臺

漢高櫟釜羹劉毅子鵝炙古人恩與仇遂乃在飲食至

今漂母祠朱薨耀霜日

夜坐

古樹搖寒風空牀對羈旅夜坐寂無人孤燈竄蒼鼠

陳祚明 二首

祚明字嗣倩仁和人稽留山人集

北征雜詩

秦郵湖曲路夜半獨行舟月出光於水蟲鳴響似秋
蘆明遠岸城闕漾中流更照蓬牕裏蕭蕭映白頭

送劉石生歸秦中

送爾難為別迢迢惜遠征君言不得意匹馬返西京
冰雪辭燕市烟花入渭城計程逢改歲千里客裝輕

陸嘉淑

四首

嘉淑字冰修海寧人有辛齋遺稿

詩話冰修崇情遠跡高酣長謠文采風流溢于
賓座晚雖藏身人海而青蓮在泥心終不染

中秋

長記中秋月當年坐夜闌祇今雙鬢影畏向一輪看節
序驚心換光輝到面寒清尊不堪把哀樂本無端

登縹緲峰

樹杪輕輿去復留百盤初盡午烟收岡巒委地低全見
墟市浮空翠欲流輕浪受風搖別島斷雲兼雨失前洲
山根處處堪垂釣何日滄浪具一舟

姑蘇懷古

二首

離離春草射臺迷苦酒城荒舊築低一夜虎丘山下雨
萬株楊柳綠初齊

戰殘江郭楚公旗野笛吹過短簿祠山上有城人不識
蛇牀花滿舊時基

韓純玉

十一首

純玉字子蘧歸安人修撰敬少子有蘧廬詩集

詩話中吳韓君望西吳韓子蘧皆輯明一代之詩君望曰詩存子蘧曰
詩兼惜其書均未布通都二子先後奄逝其家人故友不復肯出恐終
歸覆醬而已

雜感

二首

穠矣棠棣華開當芳春時繇霜將洊至何為發高枝霜
飛一何早花開一何好但恐忘憂萱化作斷腸草

明詩總卷八十一
十二
蓼蟲及桂蠹甘苦各自安賦性固有在分定不可干我
珮雖言雜豈克椒與蘭

游黃龍洞望太湖

登山水始白映水山更青山水相照耀萬象無遁形遙
天覆笠澤遠岫浮洞庭羣峰七十二散布如漂萍遊雲
變湖影長風吹溲冷中多萬斛舟揚颿無時停東流趨
瀚渤北望窺支硎直欲傲廣漢豈止欺濁涇崖端冠危
石崔嵬復瓏璣混沌不自惜穿鑿疑五丁險怪駭神鬼
鬱積生雷霆深淵開絕頂習坎類井陘井收原勿幕天
闕終未扃神龍在其下屈伏猶蝦蟇潛雖勿當用時或
肯效靈春秋虔祀典歆享惟德馨遺黎苦旱魃好雨亦
既零吾來恣憑眺徙倚觀翠屏漁歌和樵唱風磴連雲

汀時見莓苔際古人曾勒銘撫掌笑伯益失載山海經

題張鐵橋畫馬

鐵橋年已七十五醉裏踟躕拔劍舞餘勇猶令筆墨飛
迅掃驂騑力如虎維繫蕭蕭古白楊四蹄卓立明秋霜
昂然顧盼氣深穩風髮霧鬣非尋常用之疆場一敵萬
如何閒置荒垆畔壯心烈士悲暮年永日披圖發長歎

鼠書游

嗟爾穿墉物畫游安所之見人空有禮出穴竟無疑五
技未曾有兩端宜自持漫漫失長夜此去亦堪危

春日過金陵

策馬丹陽道行人白下來山青龍虎地草綠鳳皇臺舊苑花仍發新亭客自哀蒼茫風景異懷抱幾時開

菱湖晚泊

望望武林城扁舟兩日程遙峰天際沒孤月霧中生澤國長多盜荒邨亦駐兵昇平何日事把酒壯心驚

楚歸歲暮江行雜詠 二首

久泊忽開艘鄰舟欵乃同沙明千里雪帆借半江風皖口之京口吳宮望楚宮溯洄尋往蹟泯滅亂流中

一舸乘流下臨風望玉臺遠帆如不動近筏忽浮來水過潯陽急山從建德開長江天作塹此際重徘徊

寓興國寺作

擔簦栖古寺倚杖識殘碑柏樹傳神禹桃花祀息媯尋

幽歸路晚望遠下山遲浩浩長江水東流到幾時自注興國寺古

柏相傳大禹手植息夫人廟在桃花洞謂桃花夫人

起餞 江中順流而下逆風使帆也

江舟強于邁風水力相爭潦尾循環見波心曲折行持盈看往復濟險任縱橫閱世從吾術危塗處處平

楊 炤 二首

炤字明遠先世清江人移家長洲補縣學生有

懷古堂詩選

錢受之云明遠高才盛年遁跡自引疏布不厭妻子凍餒長篇短詠矢詩遂歌響振林木 顧與治

云明遠詩一往趨詣出人意表

詩話明遠詩評者比之雪山盤飀吾嫌其太滑

長蕩春汎

春心不自抑率意爲歡賞既洽尋山興復生涉江想恰
當風日佳悠然進蘭棹綠楊映垂垂黃鸝鳴兩兩此時
盡一尊浩歌激清響遙望秦餘山開懷對西爽斜陽半
邨戶遠岸挂漁網逶迤出前浦蒼蒼月初上

戲詠

顏子陋巷居安貧固爲好萬一受命長簞瓢至於老此
時白髮翁非肉則不飽百年常飢飭無乃太枯槁

安

夏二首

夏字大己無錫人有九龍山樵詩

雜興

日日雙扉掩經旬罷整冠夕陽僧寺遠秋雨女蘿寒有
竹深藏屋無花強倚闌新來綠病懶不上釣魚灘

初秋寄友

年年秋水碧連天望斷楓江釣雪船彭澤柳絲疎野岸
邵平瓜蔓冷湖田謀生計拙重憐病排悶詩多或廢眠
牢落故人空入夢豈徒雙鬢轉蕭然

方

授一首

授字子留桐城縣學生有奉川草

野外

野外無拘束青鞵東復西山行憑一杖草宿慣雙谿滑
想流匙飯甘餘入饌雞何時與兒子隨意得幽栖

俞南史

一首

南史字無殊吳江人

僧舍尋武伯不值

竹戶蘿關一徑深獨來惆悵對空林寒梅白徧春山曲
只在花間不可尋

顧

樵一首

樵字樵水吳江人

題吳儀部讀書處

軒牕面水晝常開嶺樹千重入座來二月山城飛燕子
銜泥先到讀書臺

鄧森廣

一首

森廣字東之桐城人崇禎中貢生有杲園集

巫山高

巫山峭石與天齊巫山峽裏白雲低行人莫向巫山路
猿到巫山亦夜啼

陸繁弢

一首

繁弢字儼胡一字拒石錢唐人

晨步韜光道中示移暉上人

苔徑凌晨步籬花帶露垂溪雲流不盡海日起何遲往
事每多悔他生未可期不如歸白社杖履日相隨

馮愷愈

五首

愷愈字濟仲一字道濟慈谿人元颺子有涉江

錄西江詠

贈別方爾止

豐山西距蜀山東廿載賓朋聚散中
賸我孤遊尋舊壘
把君好句弔秋風
雨侵水榭更籌澀
淚逐歌筵蠟燭紅
斗酒更要連日醉
老年兄弟幾宵同

舟中寄六弟

家園花事總參差
舊種新栽繫遠思
木筆纔移成玉樹
櫻桃小接是垂絲
曾教隴鳥分明語
未絡珠藤一兩枝
憑仗六郎勤看取
三三徑裏好題詩

榕堂雜詩 三首

紅牌祖訓甚分明
進講詞臣合講經
白日雷霆臣萬死

尚聞天語喚先生

黃公道周平
臺召對事

片語誰傳人不死
一時萬口沸都城
嚴霜獄底黃詹事
捧血淋漓寫孝經

蘆花殘月并蕭蕭
曾囑金風玉體調
華表夢中先得路
歸魂只溯海門潮

孫公碩膚沒于海外葬蘆花洲上丁丑春公與計偕夢
身卧狀元坊下南宮既捷常歎其無徵及空骨處乃國
初張狀元墓道也公昔投予手
札有金風方厲玉體善調之語

謝 晉 一首

晉字無可晚更名
孔淵會稽儒學生

贈余若水城南隱居

宇內忽岑寂
草木黯不芳
獨有歲寒姿
勁節凌清霜
平居慕栗里
松菊猶未荒
此生但飲酒
笑傲同羲皇
時會

既已殊意計難可量遙遙北郭望淒風起白楊故知年
壽永不若名行章哲人秉嘉德自使寵辱忘屈伸歸里
道出處隨天常葛巾漉糟粕短櫂歌滄浪古人不可即
日月長杳茫

錢肅潤

一首

肅潤字礎日無錫人有十峰草堂集

和徐察之九日雨阻堆山園居

閒居今日易行路古人難舟楫江方永干戈枕不安遠
烟千嶂合積雨一天寒此際逢重九茱萸未忍看

陸世儀

一首

世儀字道威太倉州人有桴亭橐

夜泊鹿城

渡頭星月暗離思滿歸舟此夜聞風雨山城一片秋

顧

超

五首

超字子超吳縣人

詩話韓高士洽有明詩存選本其最心折者子超之長歌大約兼仿溫
飛卿李長吉而神明之惜其全稟求之不得吳徵士景果偶得鈔本錄
其五詩當崇禎之際吳俗談詩者多惑於楚人之咻以
空疎蕭寂相尚若子超之出入經籍卓然羣雅之遺

葑山亭

鶴艇蕩鷗沙游人在空曲年年采香處露冷蘭苔綠憶
昔風雨中高牕幾回宿

鄭鮒馬冢

南國織錦愁花草春如翦騷裊女蘿叢陰風落紅蘚非

無十畝宮漸逐耕犁轉石馬嘶入潭金蠶不成繭夜半
玉簫鳴君蒿發淒泣

東邨

包山名勝聞九州可以卜居非一丘昔人競誇西蔡麗
吾來獨愛東邨幽梨紅柰紫櫻桃赤雨後落花分五色
腰鎌手甕鮮游民出入無非灌園客桃源去俗僅一塵
孤花片水猶迷人此間高峙浪千尺無怪從來少問津

梅花 二首

香雪伶仃瘦莫支玉壺冰滿漏遲遲寒生紙帳春多夢
影過銀屏風倒吹遙憶斷橋無月夜最憐蕭寺閉門時
梨花白燕空惆悵前後相思兩不知

凍碎玻璃片片冰珍珠簾外雪層層飲教月落重開閣
坐到星殘不用燈谷口去年曾送客嶺頭今日又逢僧
江山無限留情處幾欲攜家竟未能

鄭女冢

自湔金粉割紅絲桃杏無顏五百年晉日尼師皈白佛
唐家貴主事金仙春寒宿草猶迷蝶露濯空桑欲化蟬
幾處禁烟人涕淚玉棺風雨但聞鶻

詩話鄭駙馬冢在洞庭山駙馬生女示疾不嫁舍身為尼葬于山中釋
寶唱比牛尼傳晉土比丘尼自洛陽竹林寺淨檢始唐會要睿宗第八
女金仙公主入道蝶用韓馮事
蟬用齊女事用古却似玉溪生

蔡仲光 三首

仲光字大敬蕭山人

涼州辭

賀蘭千嶂朔風秋萬里黃河入塞流滿地胡笳邊月冷
最傷情是古涼州

排遍

水調聞歌淚滿裾思君遠戍十年餘秋來無數南飛鴈
不寄雲中一紙書

送趙魯存北還

蒼茫秋色滿江關客子菰蘆鼓櫂還河北諸君猶健否
近聞半入太行山

項聖謨

一首

聖謨字孔彰秀水人

客虎丘中秋無月

驚心吳楚客倏忽度中秋明月生何處微風倚寺樓孤
吟淹北渚極目望西疇夜靜風傳柝江臯動遠愁

侯 檠

一首

檠字武功嘉定人

酬別徐季白

滄江倚櫂且高歌游子銜杯意若何亂後飄零親戚少
天涯蹤跡別離多已悲楊柳愁中折况遇賓鴻客裏過
握手相期須努力風塵十載莫蹉跎

明詩綜卷八十二

小長蘆 朱彝尊 錄

月潭 朱明儀 緝評

周 篋 二十九首

篋初名筠字青士別字管谷嘉興布衣有采山堂集

靜志居詩話青士遭亂棄舉子業受屢賣米有括故家遺書連船鬻於市者買得一船積棧下每口中交易筐管斗斛權衡堆滿肆讀之糠粃中其為詩句敦字琢不輕讓前人片語胸無柴棘急人患難視朋友如一身人或忘大德而思小怨者不以實諸懷也晚年詩趨率易好與浮屠道士游題詠極多嘗醉書五言云似士不游庠似農曾讀書似工不操作似商謝奔趨立言頗突兀應事還狗疎飢凍不少顧吟詩作歡娛可當一幅寫照也

和李子見贈作

屠羊亦有肆賣酒亦有漿處困無賢豪在短遺其長眷
言歷饑渴黽勉方自將君子采葑菲遺我瑤華章遂令
樗櫟姿文采亦得揚朱子磊落士揆藻皆稱良繆生秉
高尚志潔言益芳泥塗惜偃蹇韞璞潛輝光嗟余共晨
夕身隱名莫彰鮑叔苟不遇寸心誰能詳

宿揖山樓

偶為寂寞游遂得高寒境天浮長泖闊雲落橫峰冷出
林鐘磬聲繞檻星河影弱喪未知歸吾衰當猛省

夜眺

中夜松徑黑不知山月高迴風動林木萬竅皆怒號宛
如泛孤舟危坐驚波濤濕螢墮遠水野鶴鳴寒臯人生
亦何嘗哀樂隨所遭長歌望河漢何以解鬱陶

結交

弟兄本同氣所稟或有殊一朝意氣乖覩然如道塗結
交乃異姓反覆誠可虞肝膽空自許安知非見誣徒然
事談笑緩急何所須嗟哉今之人結交良已愚

過白蓮寺觀銅堦

是錢鏐時故物蔣子
僧果得之施鎮此寺

銅堦如片瓦鎔鑄何工巧隆起欄楯形圖識尚可了知
是五代物厥惟錢王造是類萬有千聚散不可保幾歷
兵火災存者今已少蔣生偶獲之什襲逾重寶施舍鎮
精廬此意實微眇誦公喜我至出示光尚皎窪處填黃
金顯見諸相好屠兒額偏廣下放刀仗小一者既若斯

諸餘皆可曉

詩話宋周文璞方泉集有姜堯章金銅佛捨歌云白石招我入書齋使我速禮金塗捨我疑此捨非世有白石云是錢王禁中物上作如來捨身相飢鷹餓虎紛相向拈起靈山受記時龍天帝釋應惆悵形模遠自流沙至鑄出今回更精緻錢王納土歸京師流落多在西湖寺錢王本是英雄人白蓮花現國主身蛇鄉虎落狗脚朕何如紅袍玉帶稱功臣天封拆開即退聽雨浙不聞笳鼓競歸來佛子作護持太師尚父尚書令一枚傳到白石生生今但有能詩聲同袍秦外銛師兄哦詩禮捨作佛事同喫地爐山芋羹何曾重陸綺牀供但見相輪銅綠明哦詩禮捨猶未畢薦葉低飛山雨濕曹助松隱集有淨慈創塑五百羅漢記略云淨慈山光孝禪寺錢氏時曰永明寺慈化定慧師道潛居之嘗請於忠懿王下塔下金銅羅漢像會王夢十六大士從師而行密符其請因如所求歸十精舍是當時銅捨率歸淨慈矣近吾友青士忽於嘉禾白蓮僧寺見之別是一片乃鑄放下屠刀立地成佛故事係蔣處士忻僧果所施今仿之寺僧堅不肯承矣

次韻答吳日千

少壯不自勤垂老饑凍逼顧慙蒲柳姿難與雪霜敵誰言失東隅收之桑榆夕但計一瓦全寧問十碎壁讀書

不成名在世奚損益交游率欺給骨肉每戕賊自非生憂患於何表勞績延陵有高風早得望顏色介石性所操詎肯妄衣食無慙一瓢飲高卧三畝宅桓榮亦儻然取效稽古力時命苟我違賢豪困無策素絲為玄黃岐路復何適同病豈不懷貽詩解煎迫

雜感

去年學造蓋亢旱日已多今年學造車陸地忽成河旱潦會有時我業則孔訛蒼蒼既無私命也將奈何

擬古贈姜子

客從遠方來駕言往前綏入門奉顏色乃我故所思所思亦已久竊擬瓊樹枝諒節固所欽况復搞華詞同方

易為感遇合誠無時勿言相見晚傾蓋良在茲幽人履
貞吉志士循芳規道義苟不愆紛華亦奚為與君崇令
名庶幾副所期但恐分手去何當復追隨

同諸子集指月菴

是日
立春

落日步寒郊清溪望中闊眷言二三子精舍喜重謁庭
梅行漸舒堦草亦微發冰霜雖滿林春意辨毫末開歲
尚逾旬人事頗倉卒聊乘俄頃閒神氣得超越清談不
知疲宰勃深理窟予忝馬齒加貧賤苦筋骨功業無早
成詞華敢輕伐執鞭既覩顏獻璞還遭別茅齋歸去來
清醕為君竭

登洞山過無閔菴

洞山近湖濱驚濤走其下雙林隱青蒼上有支公社肅
客汲寒泉軒牕甚瀟灑指點林外觀風帆驚如馬頃時
画舫過詎非公等者吾徒本乘興巖壑肯輕捨已裹十
日糧要令此心寫山中橘柚熟可勿遽歸也

贈友

二首

猗猗龍門枝八尺何蕭森謁來遇良工采斲為素琴絃
以朱絲絃清徽間黃金一彈再三歎四顧無知音知音
世豈乏道遠難重尋平生慎交游始願方自今何知歲
月馳涼颺起中林愴焉感化別淚下沾衣襟努力當反
時慰此千里心

君子應世務言行為樞機輕發不一慎前功悉皆隳飲

田言集卷八十二
食雖宴樂禍患常相隨所失毫末間駟馬不可追三緘
古有戒捫舌其庶幾復彼白圭章畢身以爲期

晚登紫微山

行役喜暫休偶泊東山麓杖策登崇岡聊復肆遐矚眇
然百里秋蕭蕭方落木曠野生夕風天地寒始肅林開
海上峰隱見遞起伏崇壇表我煥黎庶走威福徒勞盡
脂膏金碧光草木隔嶺聞鳴鐘殷殷動空谷際夜煙嵐
收初月映深竹

春日臯亭訪靈章禪師巢枸居

探竒入艱阻杖策西山巔盤回出榛莽始達精廬前微
光射虛堂夕照猶西懸遺薪滿林臯爨室通源泉愛此
山中居所適安自然我來雪初霽巖壑開晴煙叢梅倚
絕壁皎潔有餘妍境絕思亦清心止如澄淵清談至分
夜擁火不得眠晨鐘發前嶺月落空寒烟

游爻山

清秋氣森爽一水搖空明樂哉茲日游遂我滄浪情透
迤轉林麓空翠忽杳冥隆隆見山脊隱若飛梁橫得從
緇錫侶復與賢豪并靈境固有待高懷亦相成山房隱
松柏下視原隰平連岡旣窈窕前峰復崢嶸泠泠乳泉
滴藥井莓苔生神迹逝已久茲山猶著名幽棲何當遂
使我塵慮輕

曉行曲

城頭月落雞初鳴鼓四起坐鼓五行霜華滿野馬蹄滑
出門莽莽雲山闊閨人挽衣雙淚流子啼女號愁復愁
誰能骨肉更相顧萬里揚鞭且西去

沈山子云極
類高青丘

題沈石田溪山圖

平生頗愛溪山游溪山到處皆淹留邇來苦為塵土縛
衣食奔走無時休眼明得見此圖画心境忽覺成清幽
重山疊嶂雲出沒修篁灌木風颭颭邨農野老各有務
壺漿餉饁來田疇樵人腰斧漁布網竊笑各自為身謀
始歎人生少閒豫况復濁世多戈矛先生筆墨不易致
真蹟豈但千金求吾生雖不識画理紙上但喜烟嵐浮
平波浩淼遠無際五湖萬里來扁舟同憂相見世尚有
不遺故舊今無儔古人貴自食其力種瓜去逐東陵侯

紫微山歌送胡天岫移居

東風吹煙綠芳渚送爾移家復何處紫微山色嵐翠重
蘭楫遙看此中去此中高隱君故人藥爐茶竈歡相親
陰崖茅屋結未久陽谷蘿軒構尚新昨夜淙淙山雨急
瑶草奇花盡沾濕今朝君去天更晴愁絕青峰向空立
與君本擬結同心那知離隔共沉吟我留市井人爭羨
君傍雲山詎易尋世間萬事真難料智士翻為愚者笑
攜李行歌且負薪渭濱不遇空垂釣紫微山北讀書臺
朝發蒲帆日暮迴為道相思難解釋扁舟月下更能來

醉後率爾作

磨甑作鏡鏡不明石田欲耕不受耕貧家讀書那得成
雞鳴狗盜孟嘗客賺人已出秦王城

雨牕言懷

蕭蕭雨若絲髮微中庭落葉高下飛幽人獨坐愁掩扉
此生虛擲良可惜修名未立髮早白回也屢空非計失
牀頭有琴復有書朝彈暮讀情何如中懷慷慨那得舒

繆天自云三句一轉韻自
本嘉州後鮮有効之者

銅雀伎

可歎漳河水仍經鄴下臺金鳧終寂寞銅雀舊飛來舞
罷羅衣卷香風總帳開西陵松柏晚歌吹有餘哀

屈五約游山陰作

五嶽游曾遍三年客未還平生詩賦在重擬渡江關日
鑄峰何處冬青樹可攀遙傳有雙鶴更放沃州山

哭然公

遠公釋門老獨卧孤峰雲隱德世莫見高風余夙聞松
杉手自種虎豹時為羣歎息永徂謝山堂空夕曛

采蓴

細蔓柔柔弱輕舟箇箇添參差方未已采摘定無嫌入
箸銀絲滑行厨翠釜黏為憐滋味別更下水晶鹽

懷舊為亡友王翊作

南浦驚心憶往年送君獨上子猷船烏衣舊巷看猶在
馬首長塗信可憐烟樹瘴深過嶺日寒潮風急渡江天

寧知陸賈遺歸橐空為王孫給墓田

九日客中寄弟

九日離亭雨三年異國愁故園兄弟在為我一登樓

城南尋鍾子不值

由拳城外草萋萋放鶴洲南夕照低惆悵相尋不相見

狂歌一曲蠡湖西

過屠東蒙邨居

白蓮寺北水東流白鹿涇西卜宅幽山雨欲來村樹黑

滿湖菱葉罨漁舟

夜入青芝塢訪靜遠禪師

雲合山根落照低亂峰無數客心迷黃昏暗入松楸路

何處鐘聲是虎溪

繆永謀 五首

永謀一名泳字天自又字于野嘉興縣學生有

苻谿集

詩話天自韶年深隱公安景陵流派一以蕭統徐陵所選及左克明郭茂倩之書規模傳習及周覽四方風氣雖殊終不改度可謂有君子之

守

述懷

幽居抱長懷恒苦無近虞翹首百年內不足當踟躕吾
黨二三子頗言心相孚振策無駑駕懸乘皆驪珠結帶
從行游風波忽相渝失路須臾間不復同馳驅聞道初
未深託俗非良圖安知阮生涕乃爾雪窮途

擬古 二首

步出城東隅言登北邙阪累累誰家墳淒淒白日晚斷
碣時復存披榛陟重巘問之何代人去我亦已遠抔土
一朝封千年不復返造化相推移須臾成聚散晝夜理
亦齊賢豪終不免彭殤皆有盡寧復論修短笑歌誰與
娛當杯勿辭滿

嚴霜下林薄野雀鳴啾啾念彼客游子舉袂風修修我
有尺一書欲寄終無由竭來入我夢歡言結綢繆遺我
紫羅襦被以青綺裘欲語未及竟行矣安能留展轉不
成寐垂涕沾衾裯相思越萬里荏苒淹三秋願保歲寒
心區區復何求

白溝河

白溝河上雨一望是寒雲野曠風難定天低樹不分荒
原經百戰遺恨失孤軍更耐郵亭月哀笳處處聞

邨居雜詠

園林風景惜當年零落交游盡可憐最是東山鄭明府

士奇白頭追憶淚潛然

陳恭尹 十五首

恭尹字元孝廣州順德人有獨漉堂集

詩話元孝降志辱身終當進之逸民之列其自序略云志學以往皆為
患難之日東西南北不能多挾書卷自隨而意有所感復不能已於言
故於文辭取諸胸臆者為多而稽古之力不及其辭可云不自滿矣論
其詩品雖稍遜于翁山然翁山祇工五言又不若元孝之諸體相稱也

企喻歌 二首

男兒欲作健不用持弓稍師子一顧笑百獸毛自落
男兒墮地日夭壽誰預知泰山與鴻毛各是人所爲

捉搦歌

江東蔗竿長丈二中間可啖兩頭棄少年往矣老無濟
四十五十無多歲

感懷 四首

海濱何遙遙遙遙三千里一里一千家家家生荆杞空
房乳狐兔荒沼游蛇虺居人去何之散作他鄉鬼新鬼
無人葬舊鬼無人祀相逢盡一哭萬事今如此國家啓
封疆尺地千弧矢人民古所貴棄之若泥滓大風松根
斷微風松子委松根尚不惜何有於松子

番禺古都會佳哉鬱嵯峩三江交洪流海水澄其波劉
項爭帝業閉關自秦佗山川足霸氣生齒存亦多海國
誠富強金鐵兼鹽鹺百貨走天下五兵雄諸華盛朝爲
外府亂政求金車使者道相望下民力薦瘡北臨漢臺
上悵望傷如何

著我遠游冠插我忘歸羽命駕將何之三星在南戶夕
鳥下高林翩翩赴其侶人生各有志榮辱何常主浩歌
激白日與此聊終古誰能共碌碌身沒名不舉蒿里足
黃塵徒增一棺土

秋氣不成寐出戶月皎皎我生多憂虞及壯已衰老如
彼霜下葉未落忽先槁當前一尊酒舉觴望蒼昊畢昂

出東方天階淨如埽玉衡無右移白日不西曉如何六合內有此顛與倒

羅浮蝴蝶歌送屈翁山

羅浮大蝴蝶言是小鳳皇六足盤胸間四翅交文章修眉若楊葉繡腹如垂囊仙人愛文采挾之游帝旁雲霞爲友朋沆瀣爲酒漿倦息珠闕上飢采若木英四海安足飛來下君子堂堂中有行子比德共翱翔

進帆石門懷古

春至景漸暄舟行日堪翫矧抱昔人心而懷斯世歎平陂互倚伏今古如宵旦石門雖夙游風物亦殊觀積峽啓奔流平沙衍高岸帆迴斷颺急櫂去餘萍散融融出渚雲役役將歸鴈卷舒寧自期寒暑爲誰換浮生貴不朽金石有銷爛仰羨樓船人英聲烜西漢

石湖觀梅花同諸子分賦得動字呈羅仲恭羅顯哉兼懷湖主人羅澹峰

溪西千樹當時種數尺枝條柔可弄不踏湖隄向一年已覺繁花密無縫經過昨日此忽忽兩夕幽懷不堪誦栽花主人隔千里花下扁舟與誰共虬髯逸興迴不羣公子翩翩復殊衆折簡相招到石牀新醅不惜開銀甕遠方英俊兼秦越滿座雄談雜嘲諷是時霜後積水清湖西滉漾波光動四山開朗有佳色孤嶼蕭疎欲含凍共誇密雪賦梁園復訝行雲入荆夢幽光漠漠去岸高

素色鱗鱗壓枝重拂衣屢愛輕辦飛行杯更遣濃香送
逆風十里氣尚滿沿流百步溪猶壅高天可厭白日墜
廚人未報清尊空老夫短檝欲早歸上客班騅亦停鞚
開牋意思已潦倒下筆詞章乃狂縱寄謝梅花勿笑人
繇來韻險難爲用

歸舟

水氣動羣木虛樓飛葉聲風燈無定燄峽月不終明託
宿維舟夜臨瀧未濟情寸心平自若應任險中行

喜陶苦子還自鹿步

無言終夕坐一雨散微涼自有碧天月隨君歸草堂荒
溝餘溜下高柳小星藏世難兼多事爲歡苦不常

鄴中懷古

山河百戰鼎終分歎息漳南日暮雲亂世姦雄空復爾
一家詞賦最憐君銅臺未散吹笙伎石馬先傳出水文
七十二墳秋草徧更無人表漢將軍

隋宮懷古

穀洛通淮日夜流渚荷宮樹不曾秋十年士女河邊骨
一笑君王鏡裏頭月下虹蜺生水殿天中絲管在迷樓
繇華往事邗溝外風起楊花無那愁

送姜山上人游南岳

送師西去重低徊曾上衡山絕頂來夏帝碑蕪蟲篆遍
楚天峰斷鴈行迴燈前鬼芋穿沙出霽後僧門鑿雪開

正是到時三二月上方明月下方雷

屈大均 二十四首

大均少補番禺縣學生名紹隆遭亂棄去為僧
名今種字一靈中年返儒服更今名字翁山有

翁山詩外

王于一云屈五賦質既超選材亦別餘子在人海和酬處士獨拔地作空中語 繆天白云詩有俚語經顧寧

人筆輒典詩有庸語入屈翁山手便超諸駿男云翁山詩白雪方潔青雲直上

詩話翁山早棄儒服託跡緇藍子識之最早其詩原本三閭大夫自王逸以下多屏置不觀後復返儒服入越讀書祁氏寓山園不下樓者五月始具曹劉潘左諸體要之七言不如五言五律勝於五古至歌行長句可無取焉

詠懷

少年學神仙披髮羅浮戲麻姑愛玉顏為作芙蓉髻簪
以明月珠拂以紅羅悅吹笛東南峰紫鸞來嘒嘒歡娛

曾幾時人世苦流離君為空中雲我為機上絲將絲繫
浮雲纏絲安可期悠悠望蓬山終古長相思

孤竹吟

我行踰萬里徬徨思故鄉黃鵠雖失所不從燕雀翔駕
言登孤竹東北望邊疆驚沙如白雪殺氣為嚴霜遊子
一何微落葉同飄颺獨智世不容箕子乃佯狂神龍為
鱗螟白刃莫能傷大義劫天下湯武誠不祥夷齊憂無
臣叩馬空慨慷白日何昭昭浮雲復茫茫吁嗟命之衰
揮涕歸首陽

贈朱士稚

神虬樂泥蟠鴻鵠安紫荊飛騰亦何難所貴忘吾形子

明言卷八十二
房久破產一身如浮萍英雄不失路何以成功名高歌
送君酒詞采鬱縱橫神仙爾何愚猶未齊死生明月在
滄海光華虛復盈毋懷千歲憂酣放聊沉冥天地一塵
垢吾心獨太清

送朱十

昨冬冱寒時方舟同入越君望赤城霞我弄邪溪月月
出香爐峰光搖東澗雪美人吹瓊簫一曲梅花發梅花
猶滿林君唱懷歸吟未游雲門寺遽別天姥岑可憐雙
白鶴相送吳江潯冉冉芳春晚桃李皆成陰貧女無刀
尺誰裁鴛鴦衿素絲亦易染孤鳳難爲音願言秉內美
龜勉同我心

又寄朱十

公子吾所思薄游滯于越秋風予不歸巖桂華已發贈
爾浣紗人耶溪弄明月

攝山秋夕作

秋林無靜樹葉落鳥頻驚一夜疑風雨不知山月生松
門開積翠潭水入空明漸覺天雞曉披衣念遠征

送客

莫上高臺望無窮是楚雲舊游稀白髮獨往易斜曛木
落諸峰見山空一葉聞祇應盤石上閒坐對秋分

初春代州作

二峪冰猶壯三關草欲薰積陰開白日春色散黃雲帳

小箏人合沙平獵馬分武皇諸樂府遺響在羅裙

忻口

忻口孤城在橫當晉上游山包寧武戍河遶秀容樓設
伏宜天險防邊及早秋太原此門戶諸將慎驅劉

魯連臺

一笑無秦帝飄然向海東誰能排大難不屑計奇功古
戍三秋鴈高臺萬木風從來天下士只在布衣中

通州望海

狼山秋草滿魚海暮雲黃日月相吞吐乾坤自混茫乘
查無漢使鞭石有秦皇萬里扶桑客何時返故鄉

題龔柴丈園

頻年遠遊去鸞鶴恨無羣采藥難供母逢山便憶君平
生無素業萬里一浮雲愛爾丘園好徘徊到夕曛

自白下至樵李與諸子約游山陰

最恨秦淮柳長條復短條秋風吹落葉一夜別南朝范
蠡湖邊客相將蕩画橈言尋大禹穴直渡浙江潮

禹廟

龍蛇盤禹穴窈窕萬峰連玉簡藏何處梅梁失幾年雙
珪開日月九鼎奠山川終古思明德謳歌俎豆前

浮湘

五年遊五嶽三度下三湘今夕衡陽宿依然風露涼鐘
愁迴鴈落歌愛采菱長木葉蕭蕭下如何客異鄉

長沙

熊繹開南楚長沙應小星城臨湘水碧苑接嶽山青帝
子留笙鶴娥皇隔洞庭徘徊秋月夜玉殿見流螢

有言王
故宮

粵江秋夜

明月生珠澥蒼茫萬里愁笙歌喧極浦風露滿孤舟落
鴈栖難定寒潮靜不流年來秋望苦不上五層樓

琪林晚望

鳥道盤千誰攀太乙林雲連金闕暗花積玉壇深北
渚空春草衡陽正夕陰雲中君未降淒斷鳳簫音

繇雲母峰上大小石樓

獨上朱明頂高尋仙子蹤玉樓夾日月秋瀑飛芙蓉白

髮幾時變青鸞安可從何人吹鐵笛忽過麻姑峰

揚州

烟火千家在江淮二水分通侯曾作鎮上相亦懸軍隋
苑青春柳雷塘薄暮雲玉鈞斜畔月芳草是羅裙

過晉太尉劉琨墓

扶風歌未罷國勢日倉皇辛苦盧從事相依在晉陽風
吹沙磧草月滿塞樓霜遺墓東安縣蕭蕭徧白楊

邯鄲道中

歎息叢臺下英雄日寂寥戰場千里在霸業百年消草
沒廉頗宅雲橫豫讓橋悲歌誰與和歸思晚蕭蕭

篁邨逢朱十

黃木灣頭月扶胥渡口舟日方逾北至火已見西流過
雨收紅豆連波狎白鷗夫君若護草一見即忘憂

荔子詞

絳囊黑葉滿邨栽小暑園門處處開五色仙禽餐不盡
又銜飛過越王臺

朱茂曙

九首

海寧潘廷章填諱

先君字子衡天啓初補秀水縣學生甲申後棄
去既卒鄉人私謚安度先生有春草堂遺藁

汪琬古文撰墓志云君諱茂曙字子衡姓朱氏先世自吳江徙居浙之秀水明故光祿大夫少傅兼太子太傅戶部尚書武英殿大學士贈太傅文恪公諱國祚之孫楚雄知府諱大競之子也母曰徐安人太師文貞公階之曾孫生母蔡氏君補縣學生數赴秋試不利最後佛鬱不得志以卒卒於康熙二年某月某日享年六十有三當君之少也文恪公方秉國政聲望赫然而時東南全盛吳越貴公子孫爭以結納賓客

相高或溺於聲色飲食詭好為游閑之風其最下者往往把持有司歎為人關說以夸耀其鄉黨而君皆恥不為也布衣蔬食怡然自適非雅相故者驟見之不知其為文恪公孫也文恪公故以清慎知名於朝汲之日家無餘貲楚雄公繼之益謹守其家法故再傳至君而其貧日甚雖名為累世貴顯而寔則與寒士不少異為人循循儒雅篤於孝友所交皆賢士大夫與之處者未見其喜愠而至於取予進退則又毅然介而有節文恪公當廢一孫以子君君讓不受叔父某富而無子君次當嗣又不受悉以推其諸弟浙江巡撫董象恒者君之友婿也或勸君往見之君固避不往蓋其好遠權勢多此類少善屬文文恪公於諸孫中最愛異之工行楷書能画山水竹石為董文敏公所稱性尤喜奕嘗期故人於閑行遇善奕者與留逆旅中久之失其期乃大困而返而君亦不以屑意也明亡意頗不自得太息曰吾老矣尚奚以諸生為哉即棄去經史之外旁習天文醫卜諸家之書逾數十萬言盡通其術晚歲鰥居雖書畫亦屏不復為惟典衣沽酒從容從善奕者游時時寓意於奕以自遣而已識者謂君之所志固未易可闕也配華亭唐氏禮部右侍郎掌翰林院事文恪公文獻之孫知石屏州事允恭之女先卒卜於年月日合葬婁家橋子彝尊彝鑿彝珩女婿周吉亥陳忱吳周瑾先是彝尊彝珩皆出嗣諸父後彝鑿天無子於是以彝珩子德鉉為之後彝尊好學有文今年秋與子定交京師子竊謂君之葬也彝尊宜自為之辭如柳子厚之表先侍御歐陽文忠之表瀧岡阡者以發揚先人之志而傳示其後人庶幾可以不媿顧不自為而以屬子子則非其人也銘曰嗚呼自君卒而浙中諸名士咸慕思之至相與立私謚曰安度先生且

謂其隱不違親貞不絕俗夫亦足以概君之生平矣傷哉斯人不可復
作有崇者丘幽魄所託既固既安維千萬年維不辱爾祖以克永其傳
嘉興繆永謀天自等謚議云古者士有諱則有謚後世惟卿大夫沒
而謚于朝易名之典蓋綦重矣然柳下黔婁其妻皆諱而謚之其後如
陶靖節孟貞曜之倫或謚于門人或謚于朋友蓋其行誼章章在人耳
目間雖不得謚于朝猶得謚于野禮也同里朱先生子衡高世之士其
平交執友與夫後生末學咸及見先生之風烈僉曰先生為故輔文恪
公孫太守君顯公子席處華腴固其素也布衣蔬食蕭然如寒士故嘗
以文章經術見重於時矣年甫強仕流離世故遂屏絕交游堅避荒之
操非其立義較然者能若是歟先生隱不違親貞不絕俗與人愉愉未
嘗見喜愠之色抑可謂與物無忤者矣考之謚法好和不爭曰安心能
制義曰度宜謚先生曰安度先生 魏冰叔云先生弱冠日就婚京師
時太傅文恪公在位日侍履約獲聞中朝掌故中歲游學留都譚禮部
元孩引以相助博稽舊典撰兩京未舊錄一編遇亂避地栖真寺南盜
至胫篋失去尋移渚城之西轉徙新勝塘北沈上舍駕推宅東北隅露
容閣以居抄撮韓詩內外傳章句以授門弟子生平不喜作韻語偶然
成絕句小詩輒工妙予嘗過長水拜先生墓覽汪戶部所為志銘於先
生撰述前而不書爰補綴其畧 王于一云先生遇人甚和而守最介
想見陶泉明居栗里司空表聖居王官谷時 沈山子云先生口不言
詩觀評點文苑英華知心賞晚唐者 張子固云子衡絕句以少勝多
詩話本生考安度府君早歲以文受知于吳范君文若既而候官曹公
學佺鄭公瑄崑山顧公錫晴鎮海何公楷上虞倪公元璐崇德吳公之
屏交相賞激暇寫山水作行楷書董尚書其昌見而歎曰不出十年子
當亂吾真矣家貧無析產崇禎中歲饑飛蝗蔽天人相食先妣唐孺人
率兩姊刺繡衣裘易米日趁乃炊府君絕無憂色奕譜畫鑑覆局開圖
不改其樂也遭亂盜劫者再青檀盡失凡九遷而定居長水敝衣破帽
口不談天下事惟與里中耆老枯棊一局濁醪數杯以
消暇日詩不多作亦摧燒之不復存也故所錄止此

寄王處士遙蒼

自我去城闕子亦棲畝丘一舍道豈遠鋒鏑迷所投耦
耕判沮溺闢徑違羊求凌晨起眺聽登我池北樓疎梅
吐冷豔小鳥鳴啁啾春風吹戶外念子心悠悠

外父石屏守唐公別業池上作

買斷一池水重編六枳籬露寒聞蟋蟀潮落走螿蜚柳
色陶元亮山心向子期逃禪有精舍留賦八關詩

逢錫山過叟

明言然卷八十一
圍碁第一品知有過文年相值三衢市且停千里船
寧愁斧柯爛不顧燈花偏倚數本河洛問君然不然

秦淮河春游即事

橋下溪流燕尾分灣頭新水慣湔裙六朝芳草年年綠
雙調鳴箏戶戶聞春雨杏花虞學士酒旗山郭杜司勳
兒童也愛晴明好紙翦風鳶各一羣

秋曉

栖鴉樹杪啼趣織籬根語不見拗花人秋露濃如雨

鶴洲對酒

已收橋下釣復此石上酌百尺凌霄花紛紛落紅萼

牽牛花

金飈初動露華滋最愛娟娟竹尾垂多少紅樓昏夢裏

不知秋色到疎籬

周青士云梅都官咏牽牛花云花蔓相連延星宿光未
收采之亦何早日出顏色休蔣勝欲曉行詞云月有微

黃籬無影挂牽牛數朵青花小蓋此花日出即萎晏起者不
及觀也先生多少紅樓二語寫出花神在風露中可為絕唱

京口別元孩後登樓作

西樓昨夜露為霜楓葉新紅槲葉黃愁絕江南望江北
雨鈴風鐸正郎當

虎丘竹枝詞

懊惱墩邊花滿枝鴉頭韞小上山遲新來嫁得兒郎偉
冷笑經過短簿祠

朱茂曜

一首

先叔字子蕃天啓中補嘉興府學生承蔭入國

子監有惟木散人豪

查韜荒云先生機事都忘可狎鷗鳥然於出處進退之間毅然不苟詩取適志

不費濡削若泉林

之水左右逢源

詩話先叔行第六孳孳為善惟日不足舍其田以瘞無主之骨崇禎辛巳餓莩滿野先叔屬納心上人藁葬不下數千又屬止觀上人收孩提之童子路為粥香花橋僧院所活又千餘人焦烟赤日中奔走不暇晚栖心禪悅謂人世大夢錄古今史傳及所見聞凡夢兆之可徵者號徵夢錄不啻二百卷暇則賦六言詩積累千百沒後遺藁悉亡可歎也生平嫉惡甚嚴而工于諛諧嘗客揚州有通門仕宦名在逆案者來見拒之繼以廩粟庖肉取而納諸寺中所寄空棺為文生祭之州人傳以為笑有新貴人語其客云人家子弟不可不令讀莊子只如養生生一篇文已絕妙先叔從翁曰以言莊子不若逍遙遙更佳坐客皆為齒冷然胸無城府同里施處士博嘗歎曰遇子蕃于道覺滿街皆聖人

人日過伯兄貴陽守放鶴洲別業是宋朱希真園
林舊址壁上題高工部詩戲作

舊業朱三十五曾種梅花滿枝恰喜草堂人日高三十

五題詩

希真達夫俱行三十五

朱茂皖

四首

先叔字子芾號芾園崇禎初補嘉興縣學生棄
去教授鄉里有願領集

俞右吉云子芾父君顯公為文恪公冢子十年郎署青袍駕馬壁壁

長安道中晚守楚雄官署如僧舍民愛之如慈母至貧不能歸假貸于上官而後就道論者比之萬石君而廉過之則以子芾侍養佐成之也不游歷窮年矻矻雙經糾史蠶頭細書盈尺滿笥未嘗少暇息文筆古奧深蔚淺學者不能句讀而子芾未嘗一自表著處昆弟間默默不出一論甲申後棄去不應試紗帽布衣徒步闌閭中或手自攜持菜把遇之者不知其為三公子孫讀數千卷書游涉萬餘里著書滿家者也
詩話先叔父芾園先生行第八少補學官弟子遠浮名務實學先大父守楚雄萬里從行繼又隨從祖思恩守由楚入粵周覽西南山水之勝所至以詩筆自娛及嘉興城破避兵夏墓蕩之北有故人丘岳託其子於先生而浮海入粵轉徙閩廣以死先生視岳之子如己子為之娶婦教以學文居室三楹書籍釜鬲盪鼓蒜果雜置几案客過或自執爨集

中詩所云三十即悼亡所苦米盪并有時賓客至手自調羹是也村居恒附載赤馬船入市市僧或昂物價以相誑者先生輒如數給之其後市人相謂曰此長者不可欺咸平其值交易焉先後授徒三十餘載

弟子著錄者百人 纛尊亦從受業 宗禎之季文尚浮華 駢儷先生獨賞
嘉定黃蘊生文以豪相授 既而語纛尊曰 河北盜賊中朝朋黨亂將成
矣 何以時文為不如舍之學古 乃授以周官禮春秋左氏傳楚詞文選
丹元子步天歌人皆笑以為迂 俄而亂不可遏矣 先生詩質實象其為
人

讀陶靖節集

人生兩儀中 形與影相親 雖曰勞逸殊 好醜豈不均 形
影莫贈答 贈答辭苦辛 賢愚等湮滅 醉者詎千春 衆輻
共一轂 有以無為珍 思慮廓然空 但隨時運淪至矣 柴
桑訓形影不如神

澧陽峽

峽口生暮雲 峽中黯如墨 柔櫓聲何多 疎燈影皆匿 八
月苦風波 十月苦盜賊

病齒

十年化離身 蒲柳零秋節 上斷左右齒 或脫或杌隉 豈
惟廢嘯歌 將欲屏麴蘖 安得逢真人 授我華池訣 頓令
危者安 粲然復駢潔 乾肉及軟骨 入脣便翦截 免效昌
黎翁 落勢崩山埒

哭王處士翔

卜居為愛一庭梅 人赴重泉花未開 縱使臘前風信準
任他飄落點莓苔

朱茂暉 二十首

先叔字子蓉秀水縣學生有鏡雲亭集

詩話明之詩家學杜者多 學李者少 學李絕句者多 學李古風者少 第
十五叔父雖曾選中晚唐人詩以行 然心慕手追 專師謫仙人者 論者

謂先叔古風蕭蕭瑟瑟警諸華流東注河漸西來伏流過峽終難得其
濬發之地或又比諸出水芙蓉天然去其雕飾其爲大雅所推挹若是

山鷓鴣詞

南北安所習風土各有宜如何鷓鴣鳥翻向燕山飛燕
山苦寒地雨雪長霏霏蒼鵝居洛陽軀體笑汝微胡鴈
自矯翼豈復銜汝歸曠然中野間日暮將何依

古風

七首

鴻鵠志千里豈顧燕雀嗤庸小委氣運安知曠士悲春
華鳥過目弦望良及時古來成功人於今知有誰荆棘
鬱相望冢土自纍纍富貴苟難期學仙宜早爲無使遂
蹉跎中心長怨追

朔風懷代馬南枝巢越禽獨我終無依動如商與參東
髮事遠游舉目徧嘔歎廓落徐泗間英風古所欽圯迹
竟冥滅流水悲餘音使我長歎息誰能明此心

桑田變滄海滄海成桑田萬事安可論天地有固然奈
何世上人白日苦喧闐奄冉以百歲身與名俱捐何知
一長暮茫茫無盡年

詰旦別親友行行辭故鄉四野何蕭條邊風生白楊不
辨車馬迹但覩荆棘場思心逐轉蓬飄飄安所將奈何
平常居使之成不祥中夜拔劔起陣星厲光芒念彼黍
離歌箕子獨哀傷

橘樹生高岡綠葉發奇色徒倚戀佳人當牕耀秋實竊
秉歲寒心歷年靡見食諒無風霜吹于何表貞質

誰云結交易交友信獨難平生未遇時彈鋏歌苦寒一
蹈形勢迹意氣摧金蘭廉翟互盈虧田竇成禍殘無故
相合離咄咄竟何歎

孟冬朔風興橘柚落華實凌晨閱場圃穡事已麤畢役
車其可休何以嗣我日雲中下鴻鴈牀下語蟋蟀黃花
既已凋田雀去何疾人生無百年上壽寧可必子有羅
裳衣曷不日鼓瑟

贈朱秋崖

廉慶金石交尹班芳蘭友傾蓋在一言相知何必久嗟
余抱嬾拙蓬蒿自甘守冰月皓虛襟雲泉共爲偶何緣
安宜生顧我獨能厚阡陌喜徑越柴關驚屢扣投我新
詩篇熈若清風瀏黃山占逸韻故人忽聚首言從攜手
來已歷丑至酉時維月仲夏連船泊皖口纜繫宵江初
話達晨星後分袂杳蹤迹相思隔南斗悠悠限百年良
晤幾迴有契闊不踰三睽違乃過九壯髮日彫謝中情
誰爲剖新知企目前且復共卮酒男兒屬有志接塵亦
何取要自踐所懷未令出處負蠡從五湖游連逃千金
壽臨風豁遐思相要期不朽

宿雲門聽竹樓寄蔣七正言

今夜宿何處雲門聽竹樓紛紛巒嶂暝个个琅玕秋芳
杜馥幽巖空泉響寒流星出梁棟明人臨河漢遊孤雲
息以閑浮子念亦休風吹野鶴起月抱孤猿愁對此達

明言卷八十一
永夜憶君徒淹留

感秋寄懷廬山高隱故人

秋氣但蕭索秋鴻日南征秋風如故人對之感我情愴
愴別緒多瀰瀰秋水盈故人五峰客抗志揚高名自欣
攜手來幾見涼飈生三秋有遺詠况乃隔生平惟應清
霜月千里同一明側耳聆虹泉俯聽驚松聲飄飄石梁
步搖曳虎溪行引領重餘想結念徒屏營

贈別黃山致言法侶還雲門

客從黃山來欲渡滄江去于越千萬峰雲門在何處致
公挺高勝攀苔從幽栖解帆樵風徑熱火蘆洲磯期我
獻之亭皎月坐山閨何時遂攜手共登青雲梯

出邪溪由東渡橋進帆鏡湖

趁筏下邪溪溪回水凌亂指顧未俄頃雲林已改觀前
瞻羣嶺高卻睇後峰斷出口尚潺潺入湖方漫漫叢叢
烟樹分蔌蔌蒹葭散邈迤迅川風宛轉隨沙鴈蘭亭懷
右軍白洋尋賀監千載迹如存一曲情可翫

於潛舟行抵桐江

浮溪始安行登山止凌緬鬱紆倦攀陟清曠縱游行目
對川禽飛耳接迅湍轉迴峰沓屢迷連烟晦莫辨夕翫
淹水宿晨興愛沙飯已入桐廬溪復歷富春峴雙臺峙
中江一竿垂日晚空波澄浩渺春雲澹舒卷但乘逸興
多詎覺古人遠

栗里

陶令辭折腰達生媿形役余無腰下組欣得附遺逸志
愛名山游不待婚嫁畢訪古入栗里摩挲醉翁石頽然
蒼烟中宛爾面猶識茅屋隱在望五柳共蕭瑟雲山何
渺渺巾車日將夕瓦雀鳴檐端稚子候門隙凡物良有
依孤生貴所適朗詠田園篇千載竟不隔

南園雜詩

鳥啼春晝閑雨過池草綠飛花不待風紛紛自相續靜
夜彈鳴琴湘簾隔華燭尚想慕幽人沉思亂心曲

東溪歌

二首

錦鳥迷沙日花飛一水香采蓮聲欲斷愁殺淶川長

水色明晴晝江花憶去年前溪好風月未可即回船

冬曉

氣峭霜逾緊牕明日乍紅昨宵風太甚寒葉樹頭空

送友人南岳

洞庭西望楚雲重一面衡山萬壑松後夜相思幾明月
憑君書到鴈迴峰

明詩綜卷八十二

日言終卷八十二

三十三

